

宋

史

百二九



列傳卷第二百二十三

宋史四百六十四

開儀同三司精鑿國寶前書家丞相監修國史編纂事都總裁官

黎

外戚中

王貽永

李昭亮

李用和

子璋璋珣

李遵勗

子端懿端惠

子端憲

子諱

子評謗

高遵裕

弟遵惠

從姪士公紀

子世則

林士

向傳範

從姪經綜經

子宗回

宋良

張敦禮

任澤

王貽永字季長淳之孫也性清慎寡言頗通書不好聲技初生十餘歲時其舅魏咸信見而奇之曰後當

類我咸平中尚鄭國公主授右衛將軍駙馬都尉從
封泰山領高州刺史再遷右監門衛大將軍獎州團
練使求外補得知單州真宗戒之曰和衆靜治卿所
當先也真拜洺州團練使徙徐州河決滑州徐大水
貽永作隄城南以禦之改衛州團練使進懷州防禦
使知澶定二州徙成德軍會有告曹汭變者貽永奏
治之遷耀州觀察使復知澶州歷彰化武定軍節度
使觀察留後拜安德軍節度使出知天雄軍徙保寧
軍節度使知鄆州州自咸平中徙城而故治為通衢
介梁山春夏多水患貽永相度地勢為築東西道三

十餘里民使之復徙定州又徙成德軍擢同知樞密
院事改副使加宣徽南院使進樞密院使父之拜同
中書門下平章事遂加兼侍中徙節鎮海以疾求罷
手詔撫諭遣上醫診視帝臨問頤尚方珍藥手取糜
粥食之貽永自言寵祿過盛願罷樞筦解使相還第
帝冀其愈也乃聽罷侍中徙彰德節度使同平章事
樞密使如故疾稍間入見命其子道卿掖登垂拱殿
仍賜五日一朝遇朝參起居許休於殿側至和初復
以疾辭拜尚書右僕射檢校太師兼侍中景靈宮使
卒贈太師中書令謚康靖當時無外姻輔政者貽永

能遠權勢在樞密十五年迄無過失人稱其謙靜子
道卿西上閭門使

李昭亮字晦之明德太后兄繼隆子也四歲補東頭
供奉官許出入禁中繼隆北征契丹遣昭亮持詔軍
中問方略及營陣衆寡之勢昭亮年雖少還奏稱旨
累遷西上閭門使出為潞州兵馬鈴轄徙領麟府路
軍馬事尋為管勾軍頭引見司兼三司衙司軍士有
逃死而冒請官廩者數百人昭亮按發之領高州刺
史知代州以四方館使復領麟府路軍馬事遷引進
使領賀州團練使歷知瀛定二州咸州團練使寧州

防禦使延州觀察使感德軍節度觀察留後擢殿前
都虞候秦鳳路馬步軍副都總管經略招討副使徙
永興路馬步軍副都指揮使并代州路副都總管安
撫招討副使未幾守代州再徙真定路都總管保州
兵叛殺官吏詔遣王果招降之叛者乘堙呼曰得李
步軍來我降矣於是遣昭亮昭亮從輕騎數十人不
持甲盾弓矢叩城門呼城上曰爾輩第來降我保其
無虞也不爾幾無噍類矣卒稍稍縋城下明日相率
存勞賜黃金三百兩給節度使奉以褒其功都轉運
開城門降改淮康軍節度觀察留後復知定州敕使

使歐陽脩言昭亮入保州以叛卒女口分隸諸軍有
輒私入其家者置不問明年拜武寧軍節度使代李
用和為殿前副都指揮使時承平久將士多因循樂
縱弛昭亮本將家子雖以恩澤進然習軍中事既統
宿衛政尚嚴多所建請萬勝龍猛軍蒲博爭勝負徹
屋椽相擊士皆惶駭昭亮捕斬之杖其主者諸軍為
之股慄帝祠南郊有騎卒亡所挾弓會赦當釋去昭
亮曰宿衛不謹不可貸卒配隸下軍禁兵自是頓肅
以宣徽北院使判河陽徙延州以南院使判澶州徙
并州成德軍拜同中書門下平章事判大名府仁宗

以金紋羅書曰李昭亮親賢勲舊命其子惟賢持
以賜徙定州改天平彰信泰寧軍節度使在定州數
言老疾不任邊事願還京師乃以為景靈宮使又改
昭德軍節度使卒贈中書令謚良僖昭亮為人和易
練習近事於吏治頗通敏善委任僚佐以故數更藩
鎮無他過昭亮妻早亡內嬖三妾迭預家政莫能制
也子惟賢字寶臣以父蔭為三班奉職後為閤門祗
候通事舍人累遷西上閤門使尋領高州刺史知莫
州州倉粟陳腐成兵大譟弗肯受州人皆恐惟賢馳
往諭曰邊兵衆則積粟多廩數多且積久能無陳腐

乎欲盡取新則陳者何所歸遂斬首惡一人流十八
軍中帖然召還提舉諸司庫務領榮州團練使知冀
州會遷補禁軍自隸籍後犯賊汚者皆絀為下軍惟
賢曰武士何可責以廉節且抵罪在昔今不可以新
令繩之帝為更其制徙恩州後遷四方館使卒惟賢
善宣辭令習朝儀仁宗頗愛之

李用和字審禮章懿皇太后弟也少窮困居京師鑿
紙錢為業劉美求用和於民間奏為三班奉職累遷
右侍禁閭門祗候權提點在京倉草場考城縣兵馬
都監太后崩詔赴喪既葬遷禮賓副使領八作司遷

禮賓使同領皇城司遷崇儀使賀州刺史改葬太后于永安領捧日天武兵護梓宮明年春又詔乘傳行太后陵還授寧州刺史歷遷澤州團練慶州防禦鄜州觀察使既而擢殿前都虞候鄜延路馬步軍副都總管未行拜永清軍節度觀察留後改真定府定州路舊制刺史以上所賜公使錢得私入而用和悉用為軍費歷侍衛親軍步軍馬軍副都指揮使拜建武軍節度使殿前副都指揮使以老乞罷軍職拜宣徽北院使逾月改彰信軍節度使同中書門下平章事景靈宮使以疾告仁宗臨問賜銀飾肩輿進兼侍中

初未有居第詔寓館芳林園用和固辭又假以惠寧
坊之官第病革帝入見卧內擢其次子珣為閣門使
賜所居第弁日給官舍餚錢五千既卒帝哭之慟贈
太師中書令龍西郡王輶朝五日制服禁中謚恭僖
帝撰神道碑書曰親賢之碑其妻卒亦輶朝成服初
仁宗以太后不逮養故外家褒寵特厚用和列位將
相能小心靜默推遠權勢論者以此稱之子璋

璋字公明以章懿皇后恩補三班借職積官為天平
軍節度觀察留後知澶州護塞商胡會河漲訛言水
且至璋據聽事自若人心乃安河亦不溢徙曹州觀

察使累遷武勝軍節度使殿前都指揮使仁宗書忠
孝李璋字弁祕書賜之宴近臣群玉殿酒半命太盞
二飲韓琦及璋如有所屬帝崩執政欲增京城甲士
璋曰例出累代不宜輒易時禁衛相告乾興故事內
給食物中有金既而果賜食衆視食中璋曰天子未
臨政已優賞汝何功復云云敢諱者斬衆乃定以武
成軍節度使知鄆州京東盜白日殺縣令略入道中
璋信賞罰擒捕盜為衰止歲大雨水競以船筏邀利
多溺死者璋一切籍之約所勝載如黃河法發卒城
州西關調夫修路數十里夾道植柳人指為李公柳

知鄧州坐失舉改節振武軍知鄧州還朝道卒年五
十三贈太尉謚曰良惠弟瑋珣

珣選尚充國公主積官濮州團練使以樸陋與主不
協所生母又忤主意主入訴禁中瑋皇恐自効坐罰
金後數年終不協主還宮珣自安州觀察使降建州
落駙馬都尉知衛州未幾主徙封岐國復珣都尉主
薨以奉主亡狀貶郴州團練使陳州安置遇赦還京
師至建武軍節度使檢校太師卒哲宗臨奠哭之贈
太師中書令

珣字公粹以蔭為閻門祗候時兄瑋為閻門副使珣

又求通事舍人仁宗曰爵賞所以與天下共之儻盡
用親戚何以待勲舊平後一年乃命之車駕視用和
疾自西上閣門副使累遷均州防禦使知相州賜御
製詩飛白字寵其行未幾遷相州觀察使時劉永年
亦同除官知制誥楊畋以為不可開僥倖之門詔他
舍人草制御史范鎮復論之命遂寢使契丹預釣魚
會獲多契丹遺以金器使還悉上之更賜黃金及李
珣忠孝字熙寧中遷宣州觀察使知潁州哲宗初進
奉寧軍留後提舉萬壽觀故事正任遇覃恩止移鎮
唯宗室乃遷官至是珣與李端慈皆特遷戚里一覃

恩遷官自此始復知相州卒年七十四

李遵勗字公武崇矩孫繼昌子也生數歲相者曰是當以姻戚貴少學騎射馳冰雪間馬遠墜崖下衆以為死遵勗徐起亡恙也及長好為文詞舉進士大中祥符間召對便殿尚萬壽長公主初名勗帝益遵字升其行為崇矩子授左龍武軍尉馬都尉賜第永寧里主下嫁而所居堂甃或瓦甃多為鸞鳳狀遵勗令鏹去主服有龍飾悉屏藏之帝歎喜領澄州刺史坐私主乳母謫均州團練使徙蔡州踰年起為太子左衛率府副率復左龍武軍將軍領宏州團練使真拜

康州團練使給觀察使祿時繼昌官刺史遵勗請班
其下許之後繼昌守涇州暴感風眩遵勗馳省不俟
命帝遣使令乘驛赴之既還上表自効帝使輔臣慰
諭之遷澤州防禦使又遷宣州觀察使求補郡自試
出知澶州賜宴長春殿在郡會河水溢將壩浮梁遵
勗督工徒七日而堤城遷昭德軍節度觀察留後拜
寧國軍節度使徙鎮國軍知許州水軍多不練習而
隸籍遵勗命部校按劾拔去十七八後以疾請援唐
韋嗣立故事求山林號詔不許初天聖間章獻太后
屏左右問曰人有何言遵勗不答太后固問之遵勗

曰臣無他聞但人言天子既冠太后宜以時還政太后曰我非戀此但帝少內侍多恐未能制之也嘗上三說五事以論時政晉國夫人林氏以太后乳母多干預國事太后崩遵勗密請置之別院出入伺察之以厭服衆論其補助居多類此所居第園池冠京城嗜奇石募人載送有自千里至者構堂引水環以佳木延一時名士大夫與宴樂師楊億為文億卒為制服及知許州奠億之墓慟哭而返又與劉筠相友善筠卒存恤其家通釋氏學將死與淳圖楚圓為偈頌卒贈中書令謚曰和文有間宴集二十卷外館芳題

七卷子端懿

端懿字元伯性和厚喜問學頗通陰陽醫術星經地理之學七歲授如京副使侍真宗東宮尤所親愛嘗解方玉帶賜之稍長出入宮禁如家人七遷濟州防禦使為群牧副使杜衍為樞密擇外戚子弟試外官迺以端懿知冀州為政循法度民愛其不擾轉運使移州捕妖人李教教已死恩州王則據城叛人有言教不死在賊軍中遂降單州團練使知均州改滑州兵馬銜轄賊平實無李教者乃以為汝州防禦使提舉在京諸司庫務遷蔡州觀察使同勾當三班院徒

三
華州觀察使以母喪起復為鎮國軍節度觀察留後
願終制許之仍給全奉服除提舉集禧觀出知鄆州
兼京東西路安撫使是歲京東水民多饑大發倉廩
以賑之置弓手局教以戰鬪遂如精兵治汶陽堤百
餘里以却水患民便之尋除寧遠軍節度使知澶州
御史中丞韓絳奏端懿無功不當得旄節不拜以留
後赴澶州數月卒訃聞帝方宴禁中為徹樂贈其家
黃金三百兩贈感德軍節度使謚良定再贈兼侍中
端懿能自刻厲聞善士傾身下之以故士大夫與之
遊甚得名譽弟端愿

端愿字公謹以穆獻公主恩七歲授如京副使四遷
為恩州團練使仁宗以歲旱御便殿慮囚放宮女端
愿上疏謂縱釋有罪小人之幸放宮女為宦者專制
反失所歸何以弭災變累進邢州觀察使鎮東軍留
後知襄郢二州本路轉運使獻羨財數十萬被賞端
愿言常賦三折其民不堪即上其事帝怒奪轉運使
賞申折變之禁移廬州富弼謂曰肥上之政何以減
於襄陽端愿曰初官喜事飾厨傳以干名則譽者至
更事既久知抑豪彊制猾吏故毀隨之弼深然其言
英宗初同提舉在京諸司庫務帝以疾拱默端愿求

對進曰陛下當躬攬權綱以係人心不宜退託失天
下望拜武康軍節度使知相州請歸除醴泉觀使神
宗即位遣使就其家錄取異時章奏賜詔褒之河東
城囉兀端忽手寫趙普諫太宗北伐疏以聞連年請
老以太子少保致仕凡大禮成賜金帶器幣品數視
執政哲宗嗣位進太子太保欽聖皇后以甥舅之故
嘗幸其第致禮於獻穆祠堂命近侍掖端忽勿拜元
祐六年卒帝輶朝臨奠贈典加等贈開府儀同三司
弟端慈子評

端慈字守道官左藏庫使執獻穆喪辭起復詔特給

奉累遷東上閣門使幹辦三班院嘗侍宴群玉殿仁宗獨賜珠花飛白字寵顧特異知邢冀衛三州至蔡州觀察使元祐中以安德軍留後卒贈昭德軍節度使謚曰恭敏兄端懿在嘉祐時嘗密請建儲人無知者卒於澶淵端懿走護其喪以歸元豐間因進對袖舊橐上之神宗歎曰近世之賢戚也由是端懿之名益著

評字持正由東頭供奉官八遷皇城使以父告老授西上閣門使為樞密都承旨出使陝西河東還言鄜延之人皆謂城羅兀非便乞速毀撤解一路之患師

出安南調兵及河東又言王師南征而取卒於西北
使蠻聞之得以窺我所論事頗多或見施行然天資
刻薄招權不忌多布耳目采聽外事自效以為忠僥
倖進用中外以目以榮州刺史出知潁州還幹當三
班院副韓縝報聘契丹且分畫河東地界凡二年乃
決賜袍帶金帛以賞勞進成州團練使知蔡州卒年
五十二贈冀州觀察使賜白金千兩評少涉書傳嘗
以公主遺奏召試學士院改殿中丞意不滿辭之後
二年再召試復止遷一官愈不悅至上書辨論及卒
人無憐者

曹佾字公伯韓王彬之孫慈聖光憲皇后弟也性和
易美儀度通音律善奕射喜為詩自右班殿直累進
殿前都虞候安化軍留後言者謂年未四十母典軍
出知澶青許三州徙河陽以建武軍節度使為宣徽
北院使知鄆州改保靜保平軍節度使同中書門下
平章事景德宮使加兼侍中封濟陽郡王神宗每咨
訪以政然退朝終日語不及公事帝謂大臣曰曹王
雖用近親貴而端拱寡過善自保真純臣也進對未
嘗名元豐中以疾告既愈入謝帝曰舅久不覲太皇
太后宜少憇內東門朕當自啓已而召入歷主下儒

釋道五閣大椿蟠桃亭再升殿乃退以護國軍節度
使司徒兼中書令為太一宮使給朱衣雙引騎吏前
馬慈聖袞紿請郡帝曰時見舅如面慶壽官柰何欲
遠朕得無禮遇有不至乎俏皇恐即城南為園池給
八作兵屯役疏惠民河水灌之且將為築三百楹第
固辭乃止高麗獻王帶為秋蘆白鷺紋極精巧詔後
苑工以黃金倣其製為帶賜侑生日賚予知宰相親
王用教坊樂工服色衣侑酒以示尊寵哲宗即位加
少保坤成節獻壽特織宰相班優詔減拜卒年七十
二贈太師追封沂王從弟偕子評謗

偕字光道少讀書知義以節俠自喜為許州都監幕
客史沆傾險劫持為不法上下畏之偕從容置酒對
客數沆十罪將擊殺之沆起拜謝偕罵曰復不改必
殺汝沆為歛迹累遷東上閣門使帶御器械知雄州
議者欲廢塘灤為田偕曰何承矩李允則營此累年
所以限契丹廢之不可進華州防禦使知相州徙河
陽總管卒嘗從梅堯臣學詩堯臣稱之為序其詩
評字公正以父任累官至引進使知審官西院積遷
溫州防禦使元祐中提舉萬壽觀丐外樞密院白為
真定路鈐轄哲宗曰先帝待慈聖家極厚其以為總

管徽宗即位遷相州觀察使歷龍神衛捧日天武都指揮使殿前都虞候馬步軍副都指揮使寧遠軍留後平海軍節度使佑神觀使使契丹者四館伴者十二在閣門十二年預修儀制多所增損性喜文史書有楷法慈聖命書屏以奉神宗即賜玉帶旌其能尤善射左手如一夜或滅燭能中伴契丹使者射嘗雙破的客驚竦在咸里號為湛厚卒年六十六贈開府儀同三司

誘字公善以蔭至左藏庫副使熙寧中父脩以疾告入謝神宗面授誘閣門通事舍人元祐中以東上閣

門使為真定府定州路兵馬鈴轄遷文州刺史使契丹至其宮門館客者下馬邀誘同入誘曰北朝使至及朝堂門兩朝積好久無妄生事卒乘馬入使還為樞密副都承旨徽宗時進都承旨歷慶州團練恩州防禦晉州觀察使保慶軍留後大觀中進安德軍節度使醴泉觀使與兄評同日拜立雙節堂於家戚里禁之性謹密習熟典故卒年六十五贈開府儀同三司謚曰忠定

高遵裕字公綽忠武軍節度使瓊之孫也以父任累遷供備庫副使鎮戎軍駐泊都監夏人寇大順城諒

祚中矢遁會英宗宴駕遣遵裕告哀抵宥州下宮夏
人遣王盥受命以吉服至遵裕切責之遂易服既而
具食上官語及大順城事盥曰剽掠輩耳遵裕曰若
主寇邊扶傷而遁斯言非妄邪夏人以為辱亟遣人
代對終食不敢發口輒忿怒曰王人蔑視下國弊邑
雖小控弦十數萬亦能躬執橐鞬與君周旋遵裕瞋
目曰主上天縱神武毋肆狂蹶以干誅夷時諒祚覘
於屏間搖手使止神宗聞而嘉之擢知保安軍橫山
豪欲向化帝使遵裕諭种谔圖之谔遂取綏州帥怒
谔擅發兵欲正軍法谔懼稱得密旨於遵裕故谔被

罪遵裕亦降為乾州都監遷通事舍人主管西路羌部駐古渭砦分所部羌兵為三等教以軍法熙寧初朝廷用王韶復洮龍命為秦鳳路沿邊安撫以遵裕副之尋以古渭為通遠軍命知軍事明年持附順羌部圖籍及繪青唐武勝形勢入獻擢引進副使帶御器械俾歸治師師次慶平堡夜行晨至野人關羌人旅拒引親兵一鼓破之進營武勝城下羌衆逃去遂據其城詔建為鎮洮軍又命知軍事尋以熙河洮岷遠通為一路進西上閣門使榮州刺史充總管復知通遠軍明年韶欲取河州遵裕曰古謂舉事先建堡

若以漸而進故一舉拔武勝今兵與糧未備一旦越數舍圖人之地使彼阻要害我軍進退無所矣韶與李憲笑曰君何遽相異邪檄使守臨洮韶攻河州果不克帝善遵裕議令專管洮岷疊巖未欵附者遵裕以逾龍珂地有鹽井遂築鹽川砦吳叱率諸羌脅青唐欲擾邊詔遣張王攻討遵裕曰青唐無罪第為生羌所脅耳遣裨將與龍珂率衆禦之青唐人見龍珂泣訴愬吳叱知不附已潰去從韶取岷州下之令士衆曰生獲老幼與得級同全活者以數萬捷聞加岷州刺史明年羌乘景思立之敗圍河岷二州道路

不通者幾月或請退保遵裕曰敢議此者斬岷城軍
缺守者恐遵裕登西門命將縱擊別選精騎繇南門
譟而出合擊之羌敗走時朝廷以岷城遠難守議棄
之詔至賊已潰矣以功進團練使龍神衛都指揮使
知熙州坐薦張穆之為轉運使而穆之有罪罷知潁
州未幾徙慶州又坐事黜知淮陽軍元豐四年復知
慶州詔與諸路討夏國請濟師得東兵十一將騎不
足用以群牧馬益之又令節制涇原兵劉昌祚先至
靈州樂得城遵裕嫉之故不用其計遂以潰歸語在
昌祚傳貶郢州團練副使哲宗即位復右屯衛將軍

主管中嶽廟卒年六十贈永州團練使紹聖中崇贈奉國軍節度觀察留後從弟遵惠

遵惠字子育以蔭為供奉官熙寧中試經義中選換大理評事歷三班院主簿軍器丞元祐初上疏言法度更張事有當否如先帝所施設未可輕議擢太僕少卿進太府卿出知河中府改河北路都轉運使未行拜工部侍郎以集賢殿脩撰知鄆州河南穎昌府加寶文閣待制知成德軍召為戶部侍郎以龍圖閣學士知慶州卒年五十八贈樞密直學士方宣仁后臨朝繩檢族人一以法度乃舉家事付遵惠遵惠躬

表率之人無間言亦能遠嫌自保故不罹紹聖之禍
從姪士林

士林字才卿宣仁聖烈皇后之弟也累官內殿崇班
殿直英宗書謹守法律四字誨之曰能此則為良吏
矣每欲進擢后屢辭輒止喜儒學涉閱經史通大義
尤有巧智嘗監揚州召伯牌稅木舊用火印士林改
刃其印文鑿以為識尤簡便傍郡皆效焉卒贈德州
刺史神宗立加贈昭德軍節度使紹興初追封普安
郡王子公紀

公紀字君正歷閻門祇候通事舍人累進寧州刺史

團練使永州防禦使集慶留後性儉約珍異聲伎無所好奉祿多以給諸族得任子恩均及孤遠特宣仁后喪未終卒贈感德軍節度使謚曰懷僖紹興初追封新興郡王子世則

世則字仲貽幼以恩補左班殿直至內殿崇班復用父遺表恩為閣門祗候後除親衛卽以通經典轉內殿承制累遷康州防禦使知西上閣門事宣和末金泛使至徽宗命世則掌客世則記問該洽應對有據帝聞悅之自是掌客多命世則金人軍城下又命世則使其軍還進秩二等遷知東上閣門使金遣燕入

吳孝民請和孝民邀宰執親王詣軍前議事高宗在
康邸請行是日世則入對遂除計議副使以從康王
復使河北世則改華州觀察使充參議官召對賜金
帶當高宗艱難中世則嘗在左右寢處不少離大元
帥府建改元帥府參議官因請布檄諸路以定人心
進遙郡承宣使不拜高宗承制轉越州觀察使及即
位除保靜軍承宣使提舉萬壽觀詔令編類元帥府
事迹付史館召為樞密都承旨兼提舉京畿監牧再
提舉萬壽觀世則居溫州帝遣中使諭守臣以時給
奉祿凡積二萬緡因請以裨郡費常病瘍難於據鞍

又以舊所御肩輿賜焉帝每念宣仁聖烈皇后保祐
三朝中遭誣詆外家班秩無顯者制以為感德軍節
度使充萬壽觀使進開府儀同三司奉朝請賜第臨
安除景靈宮使兼判溫州尋以病丐罷復為萬壽觀
使十四年召入覲進少保懇求還卒年六十五贈太
傅賜田三十頃謚曰忠節

向傳範字仲模尚書左僕射敏中之子以父任為衛
尉丞娶南陽郡王惟吉女改內殿崇班帶御器械歷
知相恩邢三州入管幹客省閣門皇城司知陝州仁
宗賜詩以寵其行熙寧初知鄆州兼京西路安撫使

諫官楊繪言傅範領安撫使無以杜外戚僥倖求之源
樞密使文彥博曰傅範累典郡非緣外戚神宗曰得
諫官如此言甚善可以止他日妄求者以密州觀察
使卒贈昭德軍節度使謚曰惠節傅範宰相子聯戚
里所至有能稱以橐中貲千餘萬葬族人在殯者六
十四喪從姪經綜

經字審禮以蔭至虞部員外郎神宗為頴王選經女
為妃改莊宅使帝即位妃為皇后進光州團練使以
維州防禦使知陳州歲中閑囚活重辟三人西華令
掠人至死誣以疾吏畏令莫敢言經得其情卒窮治

如法歲大雪輒弛公私値錢以寬民有司持不可經
曰上使我守陳民窮蓋我責我自為此不爾累也方
鎮別賜公使錢例私以自奉去則盡入其餘經獨斥
歸有司唯以供享勞賓客軍師之用知河陽會旱蝗
民乏食經度官廩歲用無餘乃先以圭田租入振救
之富人爭出粟多所濟活徙徐州遷明州觀察使召
還提舉景靈宮進定國軍留後復出知青州既行官
給車徒三官皆遣使送之車馬相屬於道未踰歲得
疾還卒于淄州年五十四詔內侍迎其喪皇后出哭
于新昌第喪至慶壽寶慈宮交遣謁者予餽后臨于

國門之外贈侍中謚曰康懿將葬遣近臣典護穿復
土給太常鹹薄帝出郊奠之周視其柩葬三日后臨
于墓下賜篆碑首曰忠勤懿戚經所至勤吏治事皆
自省決頗欲以才見於用故數請外補嘗因太祖忌
日百官班開元殿后召經見行幄勉以盡忠朝廷
經亦以善事三宮為言不及其家事子宗回宗良
綜字君章知歙縣籍閭里惡少年有盜發用以推迹
輒得通判桂州常州知隨鼎漳汾密棣沂七州沂阻
山多盜綜請用重法繩禁歲斲大辟減半兵久惰會
初置官提舉教之急衆不悅監兵夜排闥告變綜疑

三百九十六
官累中散大夫卒

宗回字子發累官相州觀察使徽宗立進彰德軍留後歷安國保信鎮南保平軍節度使檢校司空封永陽寧海安康漢東郡王開府儀同三司崇寧初有告其陰事者詔開封府鞫實御史中丞吳執中臨問宗回惶懼上還印綬以太子少保致仕言者不已削官爵流郴州行二日聽家居省咎踰年盡還其故官宗回少驕恣有小才嘗權群牧都監數以蕃息被賞出

知蔡州擒廬賊殲其黨類歲饑發廩興力役饑者得濟而官舍帑廩一新欽聖后服除起奉朝請繼命止朝朔望卒年六十二帝制服苑中贈檢校少師謚曰榮縱

宗良字景弼歷秀州刺史利州觀察使昭信軍留後奉國清海鎮東武寧寧海軍節度使永嘉郡王開府儀同三司欽聖后臨朝時嘗為陳瓘論其與蔡京相結及預政事亦能恪共自守宣和中卒年六十六贈少保

張敦禮熙寧元年選尚英宗女祁國長公主授左衛

將軍駙馬都尉遷密州觀察使元祐初疏言變法易
令始於王安石成於蔡確近者退確進司馬光以臣
觀之所得多矣進武勝軍留後章惇為政言敦禮忘
德犯分醜正朋邪密封章疏詆毀先烈引譽罪首謂
當褒崇欲其黨儔盡見收用乃責授左千牛衛大將
軍勒止朝參徽宗立有司以敦禮在貴籍奏審恩賜
帝與欽聖后皆以為當與惇等執前疏欽聖曰戚里
何必預知朝廷事當時罰亦太重矣復和州防禦使
進保信軍留後崇寧初拜寧遠軍節度使諫官王能
甫言敦禮以匹夫之賤一日而富貴具焉神宗親愛

隆厚禮遇優渥而敦禮詆毀盛德罪大謫輕今復與
之節鉞無乃傷陛下紹述之志乎乃奪節仍為集慶
軍留後大觀初復節度寧遠軍徙雄武卒贈開府儀
同三司

任澤字天錫仙遊夫人母弟也英宗入繼大統召至
延和殿授西頭供奉官賜第一區寵賚甚厚神宗時
累遷皇城使領昌州刺史護仙遊柩遷祔于濮園真
拜嘉州刺史卒贈崇信軍節度使謚曰恭僖賜墓寺
寺額為旌孝澤起田里際會恩寵能自安繩檢帝欲
廣其居固辭當任子弗請其篤謹如此

列傳卷第二百二十三

列傳卷二百二十四

宋史四百六十五

開封府司書錄軍國事前書奏丞相監修國史領經筵事都總裁院等奉

勅修

外戚下

孟忠厚

韋淵

錢忱

邢煥

潘永思

吳益弟

李道

鄭興裔

楊次山

孟忠厚字仁仲，隆祐太后兄，追封咸寧郡王。彥弼子也。后退居瑤華宮，哲宗恩眷不衰，故忠厚得以仕進。宣和中官至將作少監。靖康元年知海州，召權衛尉。

卿金人圍城后宮火出居忠厚家縣是免北遷金兵
退張邦昌迎后聽政后遣忠厚持書遺康王王即位
將迎后授忠厚徽猷閣待制提舉一行事務尋兼幹
辦奉迎太廟神主事帝幸揚州除顯謨閣直學士臺
諫六章論列帝以太后故難之后聞即命易武秩遂
授常德軍承宣使幹辦皇城司未幾奉太后幸杭州
苗傅亂平趙鼎謂張浚曰太后復辟其功甚大當推
恩外家浚乃奏忠厚寧遠軍節度使尋奉太后幸南
昌歸至越以母憂解職頃之后崩以祔廟恩起復鎮
海軍節度使開府儀同三司及后大祥封信安郡王

充禮儀使奉太后神御幸溫州紹興九年判鎮江府
改判明州兼安撫使改判婺州既而帝以太后攢會
稽乃命忠厚判紹興府兼修奉攢宮事加少保三梓
宮歸充迎護使及營佑陵秦檜當為總護使憚往乃
除忠厚樞密使以代其行檜與忠厚僚壻也然心實
忌之山陵事畢忠厚欲歸樞密府檜諷言路引故事
論列遂判福州時海寇猖獗帝憂忠厚不能弭其患
改判建康府又改判紹興府會赦加恩謝表有本
無時才出為世用語中丞詹大方希檜意論忠厚表
辭輕侮謂今日不足與有為遂罷為醴泉觀使檜死

召還行在授保寧軍節度使判平江府再改判紹興
府過闕入見復詔充萬壽觀使提舉秘書省二十七
年卒贈太保忠厚奉昭聖太后訓避遠權勢不敢以
私干朝廷明受之變太后垂簾忠厚乞裁節本家恩
澤如有夤緣令三省執奏御史劾秦檜當國親姻板
援以進忠厚獨與之忤自越入見語所善王銓曰忠
厚與檜雖有親好每懷疑心今欲求一不傷時忌對
劄銓教之但言乞免提舉學事而已然亦見廢帝以
太后擁佑功故眷忠厚特優后在瑤華三十年恩澤
未嘗陳請詔賜忠厚田三十頃以賞之既奉內祠金

使至特命押班且令月過局如宰執例及卒三子皆除直秘閣親屬六人各進以一官

韋淵顯仁太后季弟也靖康末官至拱衛大夫忠州防禦使勾當軍頭引見司金人退張邦昌遣淵持書遺康王于濟南王即位遷親衛大夫寧州觀察使知東上閣門事言橫行五司尚未遵元豐舊制乞併引進司歸客省東西上閣門合而為一以省冗費從之遂命同管客省四方館閣門事淵性暴橫不循法度帝慮其有過難於行法遂遷福建路副總管淵引疾丐祠許之淵乃言自宣和及今十二年未嘗磨勘乞

遷秩吏部言在法橫行無以年勞磨勘者帝遂不許
久之落階官除德慶軍節度使召赴行在除開府儀
同三司會建康軍帥邊順疾篤留守呂頤浩奏以淵
代帝不欲以戚里管軍不許淵陳乞恩數帝詢太后
家故例賜田五十頃旁縉錢日二十千帝久不予淵
官聞太后將入境乃封平樂郡王令逆于境上既從
后歸即令致仕又詔奉朝請遷少師淵在內不得逞
乞致仕任便居住從之未幾帝恐其肆橫於外復詔
落致仕還居賜第太后朝景靈宮淵見后出言詆毀
詔侍御史余堯弼即其家鞫治淵具伏誣罔責授寧

遠軍節度副使袁州安置數年復故職累遷太保太
傅卒贈太師子三人訖謙讓訖紹興中官至達州刺
史坐過用太后旨降武德郎與嶺外監當謙好學能
詩官至建康軍節度使謙子璞淳熙末仕至太府少
卿高宗崩擢司農少卿為金國告哀使金主錫宴其
館使欲用樂璞不可自朝至夜漏下三十刻金人不
能奪及入見其閭門令璞吉服入璞又不可日將中
乃以凶服見紹熙初除煥章閣論者以為非祖宗舊
制遂換授明州觀察使十年不遷寧宗嘉其恬退授
清遠軍節度使致仕卒贈太尉

錢忱字伯誠吳越王倅五世孫父景臻尚仁宗第十女秦魯國大長公主生忱神宗命賜名除莊宅副使騎都尉帝嘗諭景臻曰主賢宜有子為擇嘉配娶唐介孫女又晁迥外孫忱從二家遊伯父勰在翰苑因得識一時名卿哲宗愛之常使侍左右徽宗覃八寶恩為邕州觀察使遷武寧軍觀察留後喜其靖共除瀘州軍節度使欽宗加檢校少保尋納節高宗立復拜檢校少保瀘州節度使中太一宮使御書忠孝之家四字賜之進開府儀同三司紹興十五年以秦魯主終喪除少保封榮國公三十年遷少師仍舊節致

仕給真奉明年卒年八十餘贈太師子端禮自有傳
邢煥字文仲開封人以父任調孟州汜水縣主簿監
在京樂局平準務茶場以勞改宣德郎莫州司錄移
知開封府陽武縣都大提舉開德大名府堤埽歷開
封府士工儀曹詔納其女為康王妃靖康初主管亳
州明道宮王即位升右文殿修撰進徽猷閣待制諫
議大夫衛膚敏言后父不當班從臣遂改光州觀察
使除樞密都承旨煥屢奏馬伸言事切當宗澤忠勞
可倚黃潛善汪伯彥誤國其言多所裨益遷保靜軍
承宣使苗劉之變煥自度不能爭迺病免兼提舉萬

壽觀求去不已改江州太平觀遂徙居忠州紹興二年入對首陳川陝形勢利害請幸荆南分兵以圖恢復凡數百言帝甚嘉之復爲以都承旨引疾不拜擢慶遠軍節度使提舉洞霄宮煥汝學有文節儉自持未嘗恃恩私請識者取焉是年卒贈開府儀同三司謚恭簡加贈少師追封嘉國公

潘永思賢妃叔父也妃初進封詔以梁師成第賜永思建炎初為閣門宣贊舍人帶御器械元祐太后在虔帝遣永思迎歸權三省樞密事盧益頗與之交結為諫官吳表臣所論范宗尹請出永思帝曰未可姑

罷祿以困之庶知悔過遂奪職既而辛企宗言永思
嘗捕魔賊有功復為帶御器械未幾大理推治偽告
事連永思帝曰永思雖戚里既有過安可廢法乃罷
職就逮獄成追一官尋復為閣門宣贊舍人遷同知
閣門事永思乞增給廩錢戶部言其不應格法乃止
紹興八年自右武郎擢右武大夫知閣門事尋卒
吳益字叔謙蓋字叔平俱憲聖皇后弟也益建炎末
以恩補官累遷幹辦御輦院帶御器械蓋紹興五年
以恩補官累遷宣贊舍人帝與后皆喜翰墨故益蓋
兄弟師法亦有書名后受冊推恩益加咸州團練使

蓋加文州刺史帝為置皇后宅大小學教授以王鑑
為之鑑明經善訓導益盡折節事之益娶秦檜長孫
女又與王繼先交相薦引故三家姻族皆躡美官益
歷官至保康軍節度使加太尉儀同三司初既建節
以檜故授文資直秘閣檜進徽宗御製辭免加恩帝
乃特命賜益三品服累加秘閣修撰直徽猷閣以檜
提舉編修寬恤詔令又加益直寶文閣檜死其子熒
復請於帝又升敷文閣待制中丞湯鵬舉言益以庸
瑣之才恃親昵之勢乞褫職名以示至公帝謂鵬舉
所論甚切當然朕於莫檜日諭檜妻子許以保全其

家今若遽出其壻則傷恩臣僚無得更有論列自是
不復遷顯仁太后葬為攢宮總護使始進少保孝宗
嗣位進少傅又進太師封太寧郡王乾道七年卒年
四十八謚莊簡追封衛王蓋官至武寧軍節度使亦
累升太尉開府儀同三司少保封新興郡王乾道二
年卒年四十二贈太傅追封鄭王益子琚習吏事乾
道九年特授添差臨安府通判其後歷尚書郎部使
者換資至鎮安軍節度使復以才選除知明州兼沿
海制置使寧宗初乃得祠奉朝請尋知郢州再知慶
元府位至少師判建康府兼留守卒方孝宗崩光宗

以疾不能執喪大臣請太后垂簾冊立寧宗琚言於后曰垂簾可暫不可久后遂以翌日撤簾琚嘗使金人嘉其信義琚死後宋遣使至金議和屢不合金人言南使中惟吳琚言為可信琚弟璿仕至保靜軍節度使蓋子瓌亦至昭化軍節度使

李道字行之相州人其中女為光宗后初道與兄旺聚衆歸宗澤澤因事斬旺命道掌其軍澤薨道引軍依襄陽鎮撫使桑仲仲以為副都統制兼知隨州奏于朝授武義郎閭門宣贊舍人仲為霍明所殺道與統制李橫率兵縞素圍明于郢明亡去劉豫遣人持

書招道道不從執其使以聞詔嘉獎之豫怒遣將穆
楷攻道道拒破之除鄧隨州鎮撫使無知鄧州時李
橫已命別將守鄧道憚橫不敢受遂命仍知隨州樞
密院以道能察軍情不受鎮撫之命理宜褒賞詔領
榮州團練使進武義大夫胡安中守唐州勢孤不能
自立遂附豫道招之安中復來歸會李成入寇鎮撫
使李橫棄襄陽去道亦棄隨南歸至江州詔道屬岳
飛為選鋒軍統制入唐州擒偽將除唐鄧郢州襄陽
都統制從飛收復襄陽等郡授行營護軍累至復州
防禦使果州觀察使戍郢州加中侍大夫武勝軍承

宣使又升御前諸軍統制武興蠻楊再興連歲寇掠道破其衆擒再興及其二子遷保寧軍承宣使群盜朱持等聚桂陽詔道移軍衡州經理道遣高仲等擊平之落階官加龍神衛四廂都指揮使遷鎮南軍承宣使金將渝盟命道以所部戍荆南府帥臣劉錡奏改為御前前軍右軍就命道統之鎇召奏事道代為御前諸軍都統制金將劉士萼屯光化境道掩擊焚其舟蕩遂遁去尋因大將言道與鄂帥不協罷踰年起授捧日天武四廂都指揮使知荆南府隆興初湖北諸司劾其過帝曰道恃戚里妄作可罷久之再為

湖北副總管及卒乃拜慶遠軍節度使贈太尉謚忠毅后既貴進封楚王孫孝友孝純皆至節度使

鄭興裔字光錫初名興宗顯肅皇后外家三世孫也

曾祖紳封樂平郡王祖翼之陸海軍節度使父蕃和

州防禦使興裔早孤叔父藻以子字之分以餘貲興

裔不受請立義莊贍宗族及藻沒遂解官致追報之

義初以后恩授成忠郎充幹辦祇候庫聖獻后葬充

攢宮內外巡檢累至江東路鈐轄乾道初建康留司

請治行宮備巡幸興裔奏勞人費財乞罷其役且言

都統及馬軍帥皆非其人徙福建路兵馬鈐轄過闕

字四百九十八

宋史列傳卷一百三十四

李祖

入見詢以守令臧否興裔條析以對帝曰卿識時務
習吏事行當用卿會復置武臣提刑就命為之加遙
領高州刺史郡縣積玩檢驗法廢興裔剏為格目分
界屬縣吏不得行其姦因著為令建劒汀邵鹽筴屢
更漕臣請易綱運為鈔法興裔極言其不可海寇倏
去忽來調兵常無及興裔請置澳長冠至往往率民兵
禦之又言禁兵事藝不精多充私役乞行禁止尉以
捕盜改秩多偽當加審實帝善其數論事詔加成州
團練使時傳聞金欲敗盟召興裔為賀生辰使以覘
之使還言無他卒如所料累差浙東浙西江東提刑

請祠以歸尋詔知閣門事兼幹辦皇城司又兼樞密
副都承旨軍婦楊殺鄰舍兒取其臂釧而棄其屍獄
成刑部以無證左出之命興裔覆治得實帝喜賜居
第丁母憂去官服闋復故職除均州防禦使再使金
還遷潭州觀察使復請祠起知廬州移知揚州揚與
廬為隣初興裔在廬嘗郤鄰道互送禮至是按郡籍
見前所郤者有出無歸遂奏嚴其禁楊有重屯糧之
例糴他境興裔搜括滲漏以補之食遂足民舊皆茅
舍易焚興裔貸之錢命易以瓦自是火患乃息又奏
免其償民甚德之修學宮立義塚定部轄民兵升差

法郡以大治楚州議改築城有謂韓世忠遺基不可易者命興裔往視既至闕地丈餘增築之帝閱奏喜曰興裔不吾欺也紹興元年遷保靜軍承宣使召領內祠充明堂大禮都大主管大內公事寧宗即位除知明州兼沿海制置使告老授武泰軍節度使卒年七十四贈太尉謚忠肅興裔歷事四朝以材名結主知中興外族之賢未有其比子三人挺以橫行團練使歷淮襄兩道帥捐登進士甲科與抗皆有位于朝揚次山字仲甫恭聖仁烈皇后兄也其先開封人曾祖全以材武奮靖康末捍京城死事祖漸以遺澤補

官仕東南家于越之上虞次山儀狀魁偉少好學能文補右學生后受職宮中次山遂霑恩得官積階至武德郎后為貴妃累遷帶御器械知閭門事丐祠除吉州刺史提舉佑神觀后受用除福州觀察使尋拜岳陽軍節度使后謁家廟加太尉韓侂胄誅加開府儀同三司尋進少保封永陽郡王南郊恩加少傅充萬壽觀使致仕加太保授安德軍昭慶軍節度使改封會稽郡王次山能避權勢不預國事時論賢之嘉定十二年卒年八十一贈太師追封冀王子二人谷至太傅保寧軍節度使克萬壽觀使永寧郡王石字

介之乾道間入武學以恭聖仁烈后貴賜第慶元中
補承信郎差充閣門省班祇候尋帶御器械嘉泰四
年充賀正旦接伴使時金使頗驕倨自矜其善射石
從容起挽弦三發三中的金使氣沮嘉定改元除楊
州觀察使知閩門事進保寧承宣使久之授保寧節
度使提舉萬壽觀奉朝請進封信安郡侯十五年以
檢校少保進封開國公寧宗崩宰相史彌遠謀廢皇
子竑而立成國公昀命石與谷白后后不可曰皇子
先帝所立豈敢擅變谷石凡一夜七往反以告后終
不聽谷等拜泣曰內外軍民皆已歸心苟不從禍變

必生則楊氏且無噍類矣后默然良久曰其人安在彌遠等召昀入遂矯詔廢竑為濟王立昀是為理宗授開府儀同三司充萬壽觀使時寶慶垂簾人多言本朝世有母后之聖石獨曰事豈容槩言昔仁宗英宗哲宗嗣位或尚在幼冲或素繇撫育軍國重事有所未諳則母后臨朝宜也今主上熟知民事天下悅服雖聖孝天通然不蚤復政得無基小人離間之嫌乎乃密疏章獻慈聖宣仁所以臨朝之由遠及漢唐母后臨朝稱制得失上之后覽奏即命擇日徹簾進石少保封永寧郡王以壽明慈睿仁福三冊太后寶進至

太傅石性恬澹每拜爵命必力辭恭聖祔廟除太師兄谷疑於辭受石力言曰吾家非有元勳盛德徒以恭聖故致貴顯曩吾父不居是官吾兄弟今偃然受之是將自速顛覆耳矧恭聖抑遠族屬意慮深遠言猶在耳何可遽忘乃合疏懇辭至再三不受及屬疾除彰德集慶節度使進封魏郡王卒年七十一贈太師

列傳卷第二百二十四

列傳卷第二百二十五

宋史四百六十六

開國司上柱國書前書家領經事都總裁曉晚等奉
勅修

宦者一

竇神寶

王仁睿

王繼恩

李神福第神祐

劉承規

閻承翰

秦翰

周懷政

張崇貴

張繼能

衛紹欽

石知顥孫全

鄧守恩

宋世待宦者甚嚴太祖初定天下掖庭給事不過五十人宦寺中年方許養子為後又詔臣僚家毋私蓄

閭人民間有閭童孺為貨鬻者論死去唐未遠有所
懲也厥後太宗却宰相之請不授王繼恩宣徽真宗
欲以劉承規為節度使宰相持不可而止中更主幼
母后聽政者凡三朝在於前代豈非宦者用事之秋
乎祖宗之法嚴宰相之權重貂璫有懷姦慝旋踵屏
除君臣相與防微杜漸之慮深矣然而宣政間童貫
梁師成之禍亦豈細哉南渡苗劉之逆亦宦者所激
也坊記曰君子之道辟則坊與大為之坊民猶踰之
可不戒哉作宦者傳

竇神寶父思儀五代時為內侍宋初皇城使兄神興

左領軍衛大將軍致仕神寶初為黃門太平興國中
從征太原擐甲登城中流矢稍遷入內高品監并州
戍兵屢出襲賊前後破砦三十六斬千餘級大獲鎧
甲牛馬橐駝因築三砦詔褒之九年命與尹憲屯夏
州時岌伽羅膩等十四族反叛神寶率兵大破之焚
其廬帳斬千餘級虜獲甚衆雍熙中朝廷遣使綏宥
麟府州募邊部願攻契丹者賜以金帛神寶上言狼
子野心由此或生邊隙乃止俄轉殿頭高品淳化中
使河東閱視堡柵兵騎慕容德豐首刑臺徙延州未
至郡詔神寶乘傳權州事環州近邊內擾與陳德玄

討之破牛家族二十八部且規度通遠入靈武路就命環慶同駐泊牛家族復結衆叛又破之殲餘黨於極泉鎮獲其渠帥九人西戎寇鄜以援之之勞遷供奉官與田紹斌部送靈州芻糧即命駐泊李繼遷入寇與慕容德豐襲破其堡砦焚帳幕獲人畜數萬計連詔嘉獎遷內殿崇班至道祐繼遷再寇靈武神寶遣人間道告急闕下賊圍之歲餘地震二百餘日城中糧糗皆竭潛遣人市糴河外宵運以入間出兵擊賊賊引去以功拜西京作坊副使又命于浦洛河清遠軍援芻糧與楊允恭議造小車三千運糧至環州

三年遷西京左藏庫副使出使靈武還奏對稱旨面
授供備庫使咸平中出為高陽關鈐轄徙貝冀巡檢
會原州野狸族三千餘衆徙帳于順成谷大蟲堪與
熟魏族接戰詔神寶和治之至則定其經界遣悉還
舊地入為內侍右班副都知真宗朝陵留與劉承珪
同掌大內事大中祥符初勾當三班院又掌諸王宮
事遷西京左藏庫使領密州刺史兼掌從來國信神
寶務職精恪性吝嗇畜貨鉅萬天禧初以皇城使罷
內職三年卒年七十一錄其子守志為入內供奉官
王仁睿不知何許人年十餘歲事太宗于晉邸服勤

四百十一个
卷之二十一
都知洛苑副使命典宮闈出納之命最居親近嘗與
柴禹錫等發秦邸陰事雍熙四年被疾遣太醫診視
卒年四十一特贈內侍省內侍國朝以來內侍都知
押班不領他職淳化至道後皆內殿崇班以上兼充
多至諸司使有領觀察使者沒皆有贈官官給葬事
舊制內侍人許養一子以充繼嗣開寶四年以其爭
財起訟詔自今滿三十無養父者始聽養子仍以其
名上宣徽院違者準前詔抵死咸平中徐志通為溫
台等州巡檢坐取李歡男四人為假子又縱卒略民

家小兒致其母抱兒投海死決杖配掃灑班復申前
詔以戒厲之

王繼恩陝州陝人周顯德中為內班高品初養於張
氏名德鈞開寶中求復本宗太祖召見許之因賜名
焉累為內侍行首會討江南與竇神舉等部禁兵及戰
船抵采石九年春改裏面內班小底都知賜金紫十
月加武德使太祖崩副杜彥圭案行陵地尋充永昌
陵使太平興國三年遷宮苑使父之領河州刺史掌
軍器弓槍庫雍熙中王師克雲朔命繼恩率師屯易
州又為天雄軍駐泊都監自岐溝關君子館敗績之

後河朔諸路為契丹所擾城壘多圯四年詔繼恩與
翟守素田仁朗郭延濬分路按行增築之及遣將北
伐又為排陣都監屯中山改皇城使端拱初領本州
團練使又為鎮定高陽關兩路排陣鈐轄淳化初賜
甲第一區五年加昭宣使勾當皇城司李順亂成都
命為劍南兩川招安使率兵討之軍事委其制置不
從中覆管內諸州繫囚非十惡正贓悉得以便宜決
遣二月命馬步軍都軍頭王杲趣劍門崇儀使尹元
由陝路分遣討賊並受繼恩節度詔前軍所至其賊
黨敢抗王師者即須殺戮如本非同惡受制兇徒先

被脅從今能歸順者悉釋其罪四月繼恩由小劙門

路入研石砦破賊斬首五百級遂北過青彊嶺平劙

州進破賊五千于柳池驛斬千六百級賊衆惶風奔

走殺戮溺死者不可勝計又克閻綿二州五月至成

都破賊十萬餘斬首三萬級獲順及鎧甲僭偽服用

甚衆朝議賞功中書欲除宣徽使太宗曰朕讀前代

史書不欲令宦官預政事宣徽使執政之漸也止可

授以他官宰相力言繼恩有大功非此任無足以為

賞典上怒深責相臣命學士張洎錢若水議別立宣

政使序位昭宣使上以授之進領順州路防禦使繼

恩擢重兵又留成都轉餉不給專以宴飲為務每出入前後奏音樂又令騎兵執博局棋枰自隨威振郡縣僕使輒用事恣橫縱所部剽掠子女金帛軍士亦無鬪志餘賊進伏山谷間州縣有復陷者太宗知之乃命入內押班衛紹欽同領其事又遣樞密直學士張鑑西京作坊使馮守規乘傳督其捕賊議分減師徒出蜀境以便糧運高品王文壽者隸繼恩麾下繼恩遣領虎翼卒二千分遂州路追討文壽御下嚴急士卒皆怨一夕卧帳中指揮使張麟遣卒排闥入斬文壽首以出會夜昏黑麟猶疑其非然炬照之曰是

也時嘉州賊帥張餘有衆萬餘騎即以所部與之合
賊勢甚盛初奏至太宗欲盡誅軍人妻子近臣或請
勿殺悉索營中書遣帥招撫諭以釋罪親屬皆全必
自引來歸因可破賊上然之令巡檢程道符諭旨亡
卒斬嶧函首送繼恩皆自拔來歸因使為鄉導擊賊
悉平之至道二年春布衣韓拱辰詣闕上言繼恩有
平賊大功當乘機務今止得防禦使賞甚薄無以慰
中外之望上大怒以拱辰惑衆杖脊黥面配崖州俄
召繼恩太宗崩命與李神福按行山陵加領桂州觀
察使繼恩初事太祖特承恩顧又崩夕太宗在南府

繼恩中夜馳詣府邸請太宗入太宗憲之自是寵遇
莫比喜結黨邀名譽乘間或敢言薦外朝臣由是士
大夫之輕薄好進者從之交往每以多寶院僧舍為
期有潘閭者能詩詠賣藥京師繼恩薦之召見賜進
士第尋察其狂妄追還詔書及真宗初繼恩益豪橫
頗欺罔漏泄機事與參知政事李昌齡緘題往來多
請託至有連官禁者素與胡旦善時將加恩密諉其
為褒辭又士人詩頌盈門上惡其朋結黜為右監門
衛將軍均州安置籍沒貲產多得蜀土僭擬之物昌
齡責忠武軍節度行軍司馬旦削籍長流尋州詔中

外臣僚曾與繼恩交識及通書尺者一切不問咸平
二年卒於貶所遣使將其家屬還京師假官舍處之
四年聽歸葬大中祥符三年特詔追復官爵以白金
千兩賜其家子懷珪轉入內高班

李神福開封人父繼羨仕後唐為內侍顯德初為御
厨都監時內臣止以服色為貴太祖特賜紫後至右
領軍衛將軍神福少給事晉王府謹恪解上意未嘗
少怠太宗即位授入內高品從征太原攻城之際徃
來梯衝間宣傳詔命即行在所遷殿頭太平興國六
年擢入內高品押班遷副都知勾當翰林司轉入內

內班都知兼勾當祇候內品班淳化四年遷崇儀副
使勾當皇城司屬初易黃門之號轉入內黃門都知
俄加宮苑使太宗好筆札神福每侍側多獲別本之
賜及不豫神福朝夕左右躬侍藥膳真宗即位遷皇
城使內侍省入內內侍都知領恩州團練使勾當永
熙陵行宮事時模寫太宗聖容以神福立侍未幾求
罷都知加昭宣使勾當皇城司賜第宮城側遣脩內
工為葺之咸平二年秋閱兵東郊以神福為太內都
部署是冬幸大名與王繼英並為行宮使四年勾當
三班部脩含光殿賜賚甚優景德初兼領親王諸宮

使三年改宣政使從謁諸陵復為行宮使進幸西京
賜酺命神福主其事大中祥符初天書降夕神福與
劉承珪鄧永遷李神祐石知顥張景宗藍繼宗同直
禁中賜以器幣繕錢京師酺會又令神福與白文肇
閻承翰同典之是歲封泰山與曹利用同經度行宮
道路及車駕進發又為行宮使禮畢授宣慶使領昭
州防禦使整肅禁衛先是諸司使止于宣政故特置
使額以寵之三年卒年六十四贈潤州觀察使神福
性恭厚和易每為衛紹欽所詬罵皆引避不校在禁
闈五十年稱為長者然久掌三班無規制遠近失叙

有請託者不能拒之人譏其所守子懷斌懷贊弟神祐

神祐初以父任授殿頭高品太祖將納孝章皇后命
神祐奉聘禮于華州乾德五年征太原負御寶從行
開寶二年又從征太原時有詔緣邊和市軍儲車駕
在潞州聞之且慮擾民令神祐馳驛止之時詔下已
五日神祐一夕而至晉陽一日甲士旣陣賊潛縱火
焚梯衝亟命神祐部衛兵爲援斬賊甚衆餘悉潰去
王師伐廣州隨軍賞給劉鋹平先部帑藏之物赴京
師及土寇周瓊等叛又副尹崇珂討平之六年隨曹

彬南征克闐城擒偽將朱令贊命神祐馳入獻捷書
賜錦袍金帶太宗即位遷南作坊副使錢倅歸朝命
神祐往按府藏之積再征太原領工徒千人隨駕以
備繕完甲兵劉繼元表納降款太宗陳儀衛城北臺
以受之繼元移時未至神祐馳單騎入城俄湏引繼
元至及北伐燕薊命與劉廷翰統精騎為大陣之援
車駕還又令率兵屯定州以備契丹太平興國六年
滑州治河防材葷未具命神祐馳往垣曲伐薪蒸四
百萬以濟其用七年契丹寇邊命領兵屯瀛州俄改
崇儀使提點左右藏庫遷洛苑使至道初西鄙不寧

命為靈環排陣都監率衆至烏白池而還俄駐永興
復護糧運抵朔方真宗嗣位轉內園使邠州都監車
駕北巡改天雄軍都監子城內巡檢時北兵充斥道
途阻塞命神祐單騎諭密旨於諸將敵騎數百忽至
神祐乃周麾而呼若召伏兵敵懼而逃遂達其命俄
充邢州排陣都監勾當西八作司景德初上幸澶州
領隨駕壕砦三年遷入內都知從東封還遷南作坊
使時內侍將遷秩有扈從升山不升山或不預從祀
者令神祐第其勤狀上親閱而叙遷之有范守遜皇
甫文史崇貴張延訓等皆嘗有譴累而互陳勞効且

言神祐等品第非當泣訴于上止而復來者數四守
遜等先改內常侍上怒悉停其官神祐洎石知顥副
都知張景宗藍繼宗並坐削職尋掌御厨七年卒年
六十六大中祥符六年錄其孫永和為三班奉職神
祐性謹忍曉音律頗好篇詠子懷岳太宗時嘗請為
道士後復內侍多屯邊郡常持大鐵鞭以鬪賊屢中
流矢至供奉官懷儀為內殿崇班

劉承規字大方楚州山陽人父延範內班都知承規
建隆中補高班太宗即位超拜比作坊副使時泉州
陳洪進歸朝遣承規疾置封其府庫會士民嘯聚為

冠承規與知州喬維岳率兵討定之太平興國四年
命與內衣庫使張紹勣等六人率師屯定州以備契
丹又護滑州決河雍熙中勾當內藏庫兼皇城司出
為鄜延路排陣都監改崇儀使遷洛苑使至道中與
周瑩同簽書提點樞密宣徽諸房公事仍加六宅使
承規懇辭帝雖不許而嘉其退讓真宗立瑩為宣徽
使以承規領勝州刺史簽書宣徽院公事尋讓宣徽
之務加莊宅使咸平三年遷北作坊使時邊境未寧
議脩天雄軍城壘命承規乘傳經畫又命提舉內東
崇政殿等諸門遷宮苑使上詢承規西事請益環州

木波鎮戍兵以為諸路之援從之俄兼勾當群牧司
景德二年與李允則使河間按視嘗經戰陣等處將
卒之勞是歲置官提舉京師諸司庫務以承規領之
所創局署多所規制改皇城使與林特李溥議更茶
法四年三司上言新課增羨承規以勞加領昭州團
練使大中祥符初議封泰山以掌發運使遷昭宣使
長州防禦使會脩玉清昭應宮以承規為副使祀汾
陰復命督運議者以自京至河中由陸則山險具舟
則湍悍承規決議水運凡百供應悉安流而達自朝
陵東封及是皆留掌大內禮成當進秩表求休致手

詔敦勉仍作七言詩賜之拜宣政使應州觀察使五年以疾求致仕脩宮使丁謂言承規領宮職藉其督轄望勿許所請第優賜告詔特置景福殿使名以寵之班在客省使上仍改新州觀察使上作歌以賜承規以廉使月稟歸於有司手詔褒美復定殿使奉以給之本名承珪以父疾羸瘵上為取道家易名度厄之義改珪為規疾甚請解務還私第聽之仍許皇城常務上印日內藏庫有勅制就取商度又再表求罷官檢校太傅左驍衛上將軍安遠軍節度觀察留後致仕七月卒年六十四歲朝贈左衛上將軍鎮江軍

節度謚曰忠肅承規事三朝以精力聞樂較薄領致
致無倦自掌內藏僅三十年檢察精密動著條式又
製定權衡法語在律曆志性沈毅徇公深所倚信尤
好伺察人多畏之上崇瑞命脩祠祀飾宮觀承規悉
預聞作玉清昭應宮尤為精麗屋室有少不中程雖
金碧已具必毀而更造有司不敢計所費二聖殿塑
配饗功臣特詔塑其像太宗之側承規遇事亦或寬
恕鑄錢工常訴本監前後盜銅瘞地數千斤承規佯
為不納因密遣人發取送官不問其罪咸平中朱昂
杜鎬編次館閣書籍錢若水脩祖宗實錄其後脩冊

府元龜國史及編著讐校之事承規悉典領之頗好
儒學喜聚書間接文士質訪故實其有名於朝者多
見禮待或密為延薦自寢疾惟以公家之務為念遣
奏求免贈賻詔葬上甚嗟惜之遣內臣與鴻臚典喪
親為祭文玉清昭應宮成加贈侍中遣內侍鄧守恩
就墓告祭子從愿為西染院使

閻承翰真定人周顯德中為內侍入宋事太祖以謹
憲稱太宗時擢為殿頭高品稍遷內侍供奉官內殿
崇班先是八作司材木頗有隱弊承翰建議於都城
西置事材場治材以給之雍熙中知廣州徐休復奏

宋史四百六十六
卷一百一十五
宰相
轉運使王延範不軌狀遣承翰馳往同逮捕下獄就
鞫之考掠過苦延範遂坐誅李順亂蜀命為川峽招
安都監賊平授西京作坊副使會增募金吾兵以承
翰及劉承蘊分充左右金吾都監兼街仗司事俄罷
之真宗即位改迺作坊使內侍左班副都知咸平三
年河決鄆州王陵埽遣承翰護塞時議徙鄆州以避
河患又詔承翰與工部郎中陳若拙乘傳規度徙于
舊治之東南五年入內都知韓守英為鎮定高陽關
三路排陣都鈐轄上以其素無執守議別擇人因謂
宰相曰承翰雖無武勇然涖事勤恪乃令代守英時

中山屯兵甚衆艱於飛輓承翰請鑿渠計引唐河水
自嘉山至定州三十二里又至蒲陰東六十二里合
沙河經邊吳泊入界河以濟饋運亦可旁為方田上
嘉而從之渠成人以為便優詔褒之景德初契丹謀
寇順安軍承翰奉詔發雄霸精兵與荆嗣張延同築壘
禦之俄又遣詣德清軍規度重脩城壘車駕北征承
翰先在澶州北城奏契丹兵在近請不度河上不聽
促駕度浮橋二年加領廉州刺史勾當群牧司多條
上馬政遂兼群牧副使時契丹結好始置國信司主
交聘之事以承翰領之多所規置大中祥符初改西

京左藏庫使充夏虜趙德明加恩官告使還請於蒲
洛河置館以待夏臺進奉使上以荒魯勞役不許四
年遷內園使左班都知領獎州團練使有西京左藏
庫副使趙守倫父典廐牧至是又掌佑馬與承翰聯
職任雖素為姻家然不相得遂各訟訴並付御史臺
承翰坐擅用群牧司錢當贖金三十斤守倫坐違制
移佑馬司當免所居官典吏當杖脊詔寬其罰承翰
贖金十斤守倫贖金二十斤典吏亦降從杖群牧都
監張繼能判官陳越田穀勾當驥驥院楊保用佑馬
楊繼凝皆釋之制置使陳堯叟特免按問六年上製

內侍箴賜之承翰表請刻石省中明年建應天府為
南京作鴻慶宮設太祖太宗像遣承翰自京奉往授
南作坊使入內都知未幾卒年六十八贈懷州防禦
使承翰性剛彊所至過於檢察乏和懿之譽子文應
西京左藏庫使

秦翰字仲文真定獲鹿人十三為黃門開寶中遷高
品太平興國四年崔彥進領衆數萬擊契丹翰為都
監以善戰聞太宗因加賞異謂可薦任雍熙中出為
瀛州駐泊仍管先鋒事遷入內殿頭高品鎮定高陽
關三路排陣都監淳化四年補入內押班趙保忠叛

命李繼隆率師問罪翰監護其軍次延州翰慮保忠
遁逸即乘驛先往矯詔安撫以緩其陰計王師至翰
又諷保忠以地主之禮郊迎因並驅而出保忠遂就
擒以功加崇儀副使至道初為靈環慶州清遠軍四
路都監真宗即位加洛苑使入內副都知咸平中河
朔用兵以為鎮定高陽關排陣都監敗契丹于莫州
東追斬數萬盡奪所掠老幼詔褒之徙定州行營銳
轄王均之亂為川峽招安巡檢使時上官正與石普
不協翰恐生事為曉譬和解之親督衆擊賊中流矢
不却五戰五捷遂克益州上手札勞問翼日進至廣

都斬首千餘級獲馬數千匹歸朝遷內園使領恩州
刺史出為鎮定高陽關前陣鈐轄又徙後陣破契丹
二萬衆于威虜軍西俘其鐵林大將等十五人又為
邠寧涇原路鈐轄兼安撫都監率所部按行山外召
戎落酋帥諭以恩信凡三千餘帳相率內附未幾康
奴族拒命翰與陳興許均深入擊之斬級數千焚其
廬帳獲牛馬甚衆復與陳興曹瑋襲殺童埋軍主于
武延鹹泊川詔書加獎賜錦袍金帶白金五百兩帛
五百匹景德初車駕將北巡先遣翰乘傳往澶魏裁
制兵要許便宜從事俄充邢洛路鈐轄與大軍會德

清軍張掎角之勢又召為駕前西面排陣鈴轄管勾大
陣翰即督衆環城浚溝洫以拒契丹功畢契丹兵果
暴至翰不脫甲冑七十餘日契丹乞和凱旋留泊澶
州月餘令率所部兵還京師加宮苑使入內都知出
為涇原儀渭鈴轄先是西鄙無藩籬之蔽翰規度要
害鑒巨輒計工三十萬役卒數年而成不煩於民就
遷皇城使入內都知以翰在邊久宣力勤盡特置是
名以寵異焉翰表讓不聽大中祥符初求從東封手
詔諭以西番委任之異改昭宣使又為群牧副使祀
汾陰是歲夏州屬云有擾境上者即日遣翰往睢上

按視遍巡邊部及翰至事寧復還扈從凡行在諸司
細務悉令裁決不須中覆禮畢加領平州團練使奉
祀亳州掌如汾陰八年營葺大內詔翰參領其事閏
六月暴卒於內庭之解年六十四上甚悼惜為之泣
下贈貝州觀察使謚懿加等脩內畢詔遣使以襲衣
金帶賜其家翰倜儻有武力以方略自任前後戰鬪
身被四十九創李繼遷之未賓也翰因使常出入其
帳中無疑間嘗白太宗言臣一內官不足惜願手刺
此賊死無所恨太宗深嘉其忠翰性溫良謙謹接人
以誠信群帥有剛狠不和者翰皆得其懼心輕財好

施與將士同休戚能得衆心皆樂為用其歿也禁旅
有泣下者九年重贈彰國軍節度詔楊億撰碑文億
以其不蓄財表辭所贊物雖朝廷不許而時論美之
子懷志內殿崇班

周懷政并州人父紹忠以黃門事太宗從征河東得
懷政于亂屍間養為子給事禁中累至入內高品大
中祥符初真宗東封命脩行宮頃遞及奉泰山天書
馳驛赴闕轉殿頭天書每出宮與皇甫繼明並為夾
侍東封禮成與內殿崇班康宗元留泰山脩圜臺轉
入內西頭供奉官祀汾陰轉東頭六年劉承規卒擢

內殿崇班入內押班勾當皇城司會朝謁太清宮與
閻承翰等同管勾大內事七年奉天書摹刻于乾元
殿為刻玉都監又為脩兗州景靈宮太極觀都監俄
遷內殿承制是冬命起居舍人知制誥盛度為會真
宮醮告使懷政為都監還為玉清昭應宮都監兼掌
景靈宮會靈觀使刻玉成遷如京副使九年建資善
堂以懷政為都監壽丘宮觀成優賜襲衣金帶遷崇
儀使天禧大禮又為脩奉寶冊都監加領長州刺史
是冬遷洛苑使二年春遷左藏庫使仁宗為皇太子
命為入內副都知管勾左右春坊轉左驥驥使三年

領英州團練使加昭宣使懷政日侍內廷權任尤盛
於是附會者頗衆往往言事獲從同列位望居右者
必排抑之中外帑庫皆得專取因多入其家性識凡
近酷信妖妄有朱能者本單州團練使田敏廝養為
人凶狡遂賂懷政親信得見因與侍卒姚斌妄談神
怪以誅之懷政大惑援能至御藥使領階州刺史俄
於終南山脩道觀與劉益輩造符命託神言國家休
咎否臧大臣及寇準鎮永興能為巡檢倚準舊望欲
實其事準好勝喜其附已多依違之朝臣屢言懷政
之妄真宗含忍不斥然漸疎遠之懷政憂懼時使小

黃門自禁中出詐稱宣召入內東門坐別室久之而還以欺同類會準為相踰年而罷懷政愈畏獲譴不自安四年七月與弟禮賓副使懷信謀潛召客省使楊崇勲內殿承制楊懷吉閣門祇候楊懷玉會皇城司期以二十五日竊發殺丁謂等復相寇準奉真宗為太上皇傳位太子前夕崇勲懷吉詣第密告之謂即夜偕崇勲懷吉至曹利用第計議翌日利用入奏真宗怒命收懷政令宣徽北院使曹瑋與崇勲於御藥院鞫訊具伏帝坐承明殿臨問懷政但祈哀而已命斬于城西普安寺父內殿承制紹忠及懷信

並杖配復岳州子姪勒停貲產沒官朱能父左武衛
將軍致仕諤母周氏罰銅百斤子守昱守吉分配邵
蔡道州懷政僕使親從並杖配海島遠州部下使臣
貶秩有差懷政之未敗也紹忠嘗詰之曰研頭豎子
終累我懷信謂之曰兄前事必敗宜早詣上首實庶
獲輕典及其謀亂又泣拜止之不聽故皆得免死右
街僧錄澄遠以預聞妖詐決杖黥配郴州內供奉官
譚元吉高品王德信高班胡允則黃門楊允文與懷
政協同妖妄皆杖配遠州入內供奉官石承慶嘗為懷
問往還削兩任配房州入內供奉官

政所召夜二鼓不下皇城門鑰以待黃門黃守忠見之戒門卒勿納至是言其事承慶坐削兩任配宿州楊懷玉次日始詣樞密院自陳責授侍禁杭州都監擢崇勳內客省使桂州觀察使懷吉如京使賜以金帶金銀懷政旣誅亟遣入內供奉官盧守明鄧文慶馳驛永興捕朱能劉益李貴康王唐信道士王先張用和悉免死配遠州能偵知使者至東甲出殺守明以叛詔遣內殿承制江德明入內供奉官于德潤發兵捕之能入桑林自縊死永興乾耀都巡檢供奉官李興本軍十將張順斷能及其子首以獻補興閣門

祇候順牢城都頭以劉益等十一人黨能害中使磔于市王先李貴唐信張用和八人皆處斬能母妻子弟皆決杖配隸閣門祇候穆介知永興軍府朱巽轉運使梅詢劉楚知鳳翔府臧奎等坐與懷政能交結相稱薦皆論罪降冠準太常卿再貶道州凡朝士及永興鳳翔官吏與準厚善者悉降黜焉

張崇貴真定人太祖時為內中高品稍遷殿頭太平興國中以善射選為御帶錢倣納土命馳往閱城防儲備之數親征太原從崔彥進李漢瓊先路視水草端拱初補內供奉官淳化四年命乘傳之延州招羌

戎之內附者發庫錢犒給以金幣賜酋領將行轉內班右班押班就命管勾鄜延屯兵李繼隆討李繼遷詔崇貴以延安兵掎角進討及擒趙保忠留崇貴與石霸守綏州徙平夏民以實之繼遷扼橐驅路驅脅內屬戎人崇貴與田敏率熟倉族卽遇戰於雙堆殺二千餘級掠牛羊橐駝鎧甲甚衆連詔褒諭繼遷走漠中遣其將佐趙光祚張浦求納欵會于石堡砦崇貴椎牛釀酒犒諭之給以錦袍帶會改內班為黃門命為黃門右班押班仍加內殿崇班又改黃門為內侍職隨易焉旣而繼遷貢橐駝名馬待罪遣崇貴往

賜器幣茶藥衣物至道元年進崇儀副使內侍右班
副都知時繼遷復叛刦芻餽于浦洛河二年詔李繼
隆大發師進討賊圍靈州急太宗將棄之廷議未決
命崇貴與馮訥乘傳往議其事乃益兵固守就命為
靈環慶州清遠軍路監軍又為排陣都監真宗立拜
洛苑使右班都知管勾并州軍馬自至道後五路討
賊兵戰相繼卒無成功及是保吉復脩貢詔以定難
節度授之命崇貴持詔命衣帶器幣以賜使還加六
宅使咸平元年又命管勾鄜延屯兵泊延安改駐泊
都監又為鉉轄其後繼遷復與熟戶李繼福為隙因

緣內擾崇貴與張守恩擊之焚廬舍獲貲畜器甲生
口甚衆又與王榮禦賊獲具裝馬數十四再詔褒飭
四年詔歸俄領獎州刺史復泣鄭延仍制置沿邊青
白鹽事與衛超領軍入敵境焚廬舍帳幕獲廩糗牛
羊復被詔獎崇貴屢調契丹事傳遍以聞願身當一
隊為前鋒詔不允景德元年保吉死其子德明尚幼
崇貴移書諭朝廷恩信德明請俟釋服稟命詔書慰
撫以向敏中為緣邊安撫使自是邊防事宜經制小
大皆崇貴專主之築臺保安北十里許召戎人會議
與之盟約二年春召赴闕面授方略許德明以定難

節度西平王賜金帛繙錢各四萬茶二萬斤給內地
節度奉聽回圖往來放青鹽藥凡五事而令德明納
靈州土彊止居平夏遣子弟入宿衛送略去官吏盡
散蕃漢兵及賀口封境之上有侵擾者稟朝旨凡七
事德明悉如約惟以子弟入質及納靈州為難故亦
禁鹽如舊不許回圖三年九月以德明誓表來上崇
貴因請入朝許之以功拜皇城使內侍左右班都知
領博州團練使又持旌節詰命授德明太常博士趙
湘為之副四年使還會車駕上陵次瓊林苑崇貴對
于苑中即命為行宮使是秋復還延安供奉官曹信

時監邊軍信善琴崇貴與石普軍中宴集令信奏之
信以父廢為辭崇貴與普因摭其他過以聞真宗知
其誣奏不問大中祥符元年加昭宣使崇貴父在邊
善識羌戎情偽西人畏服每德明有所論述及境上
交侵皆先付裁制夏州趣邊有二路其文移至環慶
者皆付延州議焉嘗請置緣邊安撫使如北面之制
上曰西鄙別無經營苟德明能守富貴無慮朝廷失
恩信也增置署局徒為張皇不若委卿靜制之二年
上言父去鄉里願得告歸葬父母許之錫與甚憂復
命為都鈐轄提舉榷場崇貴乞留京師面諭委屬之

意聽歲入奏事四年八月卒年五十七帝悼惜之贈
豐州觀察使內侍護喪還京師子承素東染院副使
張繼能字守拙并州太原人父贊晉末為內班繼能
建隆初以黃門事禁中太平興國初為內品從征河
東命主城南洞屋以勞遷高品契丹入寇命為高陽
鎮定路先鋒都監從崔彥進戰長城口多所俘馘明
年又與彥進敗契丹于唐興口轉殿頭高品雍熙中
夏州叛命李繼隆為銀夏都部署以繼能監軍俄徙
護定州屯兵領驍捷卒三千也五回領端拱初遷入
內殿頭從趙保忠討李繼遷保忠薦其有材命與保

忠同經略其事代還掌內弓箭庫淳化三年與白承
睿護芻粟入靈武會繼遷復寇邊命繼能承睿與知
靈州侯延廣領騎卒五千同主軍務俄留為本州都
監及鄭文寶議城威州清遠軍繼能護其役工畢命
與西京作坊副使張延洲同知軍事又與田紹斌同
掌積石砦遷內供奉官靈環慶清遠軍後陣都監
與西人轉鬪敗走之復還清遠詣闕奏事遷內殿崇
班未幾拜供備庫副使復遣護環州屯兵徙涇原儀
渭都巡檢使真宗即位遷崇儀使靈環十州軍兵馬
都監兼巡檢安撫使咸平三年王均之亂命為川峽

兩路招安巡檢使成都平留為利州招安巡檢尋召
歸會銀夏寇警復為邠寧駐泊都監夏人寇清遠軍
營于積石河繼能與楊瓊馮守規在慶州逗遛不時
赴援致陷城堡又焚棄青岡砦特詔下御史府免死
長流儋州景德二年會赦還為內侍省內常侍又為
陝西捕賊巡檢獲千餘人改內殿崇班從朝陵為行
宮四面巡檢四年宜州卒陳進為亂初知州劉永規
馭下嚴酷課澄海卒伐木葺州廨數不中程即杖之
至有率妻孥趣山林以來者雖甚風雨不停其役故
進因衆怨殺永規及監軍國鈞擁判官盧成均為帥

據其城七月奏至詔東上閣門使忠州刺史曹利用
供備庫使賀州刺史張煦為廣南東西路安撫使如
京副使張從古及繼能副之虞部員外郎薛頴同勾
當轉運事發荆湖蘄黃州兵討之上語近臣曰畨禹
寶貨雄富賊若募驍果立謀主沿流東下趣廣州則
為患深矣遣內侍高品周文質使廣州監屯兵會隣
路巡檢使控要路集東西海戰權扼端州峽口賊悉
衆來攻柳城縣殿直韓明許貴郝惟和以所部兵千
餘禦敵明貴死之惟和僅以身免成均奉宜州印遣
使詣舒貴求赦罪是夕進復陷柳城官軍退保象州

賊又寇懷遠軍知軍殿直任吉與邕桂巡檢殿直張崇寶侍禁張守榮擊走之賊退而復集者累日吉輩固守屢與鬪大獲其器甲又攻天河砦砦兵甚少監軍奉職錢吉部分嚴整一戰敗之賊衆屢衄頗潰去衆心攜貳將棄宜州以家屬之悼耄者五百人隕江中率其衆裁三千趣柳象將入容管初至柳州限江不能度知州王昱望賊遁走城遂陷朝廷以詔書四十分掲要路諭賊歸順者悉釋其罪賊挈族居思順州分兵攻象州利用命入內高班于德潤以千兵倍道襲逐利用等繼至遇賊武僊縣之李練鋪賊初不

知覺惟進率衆來拒直犯前軍前軍寄班侍班郭志
言麾騎士左右縱擊賊衣順水甲執標牌以進飛矢
攢鋒不能郤前軍即持棹刀巨斧破其牌史崇貴登
山大呼曰賊走矣急殺之賊心動衆遂潰逐北至象
州城下賊砦猶有據長竿瞰城中者成均始挈其族
以詔書來降乃斬進并其黨生擒賊帥六十餘人斬
首級獲器甲戰馬甚衆利用分兵捕餘寇遣于德潤
馳奏其事授利用引進使煦如京使從古莊宅副使
繼能供備庫使志言供備庫使又以御前忠佐馬步
軍副都軍頭郭金豐爲都軍頭領勤州刺史歸遠軍

士卒殺進者李昊劉宗趙敏並補本軍頭張守榮為
供奉官閣門祇候張崇寶任吉並為供奉官錢吉為
右侍禁又以知象州大理寺丞何邴最有勞優拜祠
部員外郎賜緋又賜邴三子知道知古知常出身邴
之親屬同杆冠者悉甄叙之升象州為防禦使初賊
攻象州城在高丘上素無井閑壘之日皆以乏水為
慮賴天雨停水將竭而雨復下如是者兩月汲之以
濟山中無烽候每欲破賊即禱於城西神祠或見巨
蟒吞鼯是日果有克獲衆以為神靈助順之應張守
榮俄病瘡遣尚醫馳往視之未至而卒贈如京使錄

其子官十二月餘冠悉平東封留繼能為京舊城內
巡檢鈐轄俄加東染院使大中祥符二年入內都知
李神福等坐事悉罷擢繼能入內侍省副都知時宗
室多召侍講說書上嘉其勤學令講誦日別給公膳
專遣繼能主之俄又與內殿承制岑保正提點郡縣
主諸院事三年兼群牧都監祀汾陰留掌大內兼舊
城內巡檢鈐轄俄領會州刺史謁太清宮為天書扶
侍都監七年以疾求解職不許命為涇原儀渭鎮戎
軍兩路鈐轄未幾徙鄜延都鈐轄先是內屬戶殺漢
口者止罰孳畜繼能則麗於常法繇是西人畏而不

敢犯德明雖受朝命而羌部不絕寇境繼能日課卒
截竹為簽署字其上且言以備將士記殺獲功狀賊
聞之甚懼歸朝復泣群牧仁宗在儲宮嘗親書一幅
賜之繼能以聞真宗亦為標題其末人以為榮九年
坐前護脩莊穆皇后陵摧陷左授西染院使掌往來
國信天禧初復西京左藏庫使國信司吏陳誠者頗
巧黠繼能欲援置群牧司而誠先隸群牧坐事停職
至是群牧吏左宗抉其宿負白制置使曹利用故誠
不遂所求繼能怒宗之沮已密遣親事卒偵宗會宗
弟元喪妻宗嘗為假敦駿軍校馬送葬及還元抵飲

肆與酒保相駁繫府中而假馬之事未發誠即白繼能請屬府中并効其事知府樂黃目受屬獄未就為群牧副使楊崇勲所發繼能坐罷內職降授西京作坊使出為邠寧鉞轄繼能自陳不願外任得掌瑞聖園尋領往來國信所三年復為西京左藏庫使內侍右班副都知未幾遷崇儀使以衰老求解職轉內園使掌瓊林苑五年卒年六十五特贈汀州團練使錄其子懷忠為大理寺丞孫述為三班奉職遜為借職春坊祇候繼能性沉密知兵頗勇敢喜讀書然好治生晚年急於聚蓄衆以此少之何耶後歸朝知磁州

而卒一子知崇裁十餘歲特補太廟齋郎又徙其姪平夷尉知古為滏陽尉省郎無賞延之例猶以城守勞故甄錄焉

衛紹欽開封人父漢超內侍高品紹欽始以中黃門給事晉邸太宗即位補入內高品甚被親倚從征太原命督諸將攻城劉繼元降命領騎卒先入城燒其營柵遷殿頭高品雍熙二年擢入內西頭供奉官淳化中部脩皇城功畢授入內押班五年加崇儀副使李順之亂王師致討與王繼恩同領招安捉賊事遇賊鬪學射山南又攻清水埧破雙流砦招降數萬衆

斬千餘級順死餘黨保險為寇又與楊瓊先扼要路以邀之擒斬萬餘人獲器甲槍槊千餘遺別將曹習領兵捕餘賊于安國鎮斬三百級時嘉眉二州賊尚擾城郭又遣內殿崇班宿翰討之兩川平召還深被褒勞真宗嗣位拜宮苑使領愛州刺史充入副都知脩奉永熙都監既復土遂為陵使景德元年改皇城使從幸河朔命為車駕前後行宮四面都巡檢次澶淵命領扈駕兵守河橋三年加昭宣使朝諸陵復為行宮巡檢駐洛陽命為皇城內外都巡檢歷掌三班院皇城儀鸞翰林司卒年五十六紹欽苛慎少恩

不為衆所附太平興國中江東有僧詣闕請脩天台
壽昌寺且言寺成願焚身以報太宗允其請命紹欽
往督營繕旣訖役遞積薪於廷請僧如願僧言欲見
至尊面謝紹欽曰昨朝辭日親奉德音不煩致謝僧
惴怖偃蹇顧道俗望有救之者紹欽即促令躋薪上
火旣盛僧欲投下紹欽遣左右以叉抑按而焚之子
承慶至內殿承制

石知顥真定人曾祖承渥梁尚食使祖守忠晉內供
奉官父希鐸高品知顥形貌甚偉建隆中授內中高
品太宗即位改供奉官雍熙中諸將征幽薦以知顥

隨軍歸掌儀鸞爲司淳化中明州初置市舶司與蕃商
貿易命知顯徃經制之轉內殿崇班親王諸宮都監
從王繼恩平蜀寇就遷西京作坊副使咸平初遷正
使帶御器械契丹犯邊上北巡命爲天雄軍澶州巡
檢使俄改德博等州緣河巡檢使兼安撫加領長州
刺史三年戍鎮定高陽關三路押大陣是冬改高陽
關駐泊行營鈐轄歸朝復掌親王諸宮事景德中自
京抵泗遣徒治河堤命總其役初計工累月及是決
日而畢上面加褒諭賜白金千兩授入內都知大中
祥符初遷內園使俄以定內侍遷秩品第不當爲其

列所誣坐罷都知三年為并代州鈐轄遷莊宅使徙
鎮定高陽關鈐轄四年命與內殿崇班張繼能供奉
官侍其旭同脩太祖神御殿上封求觀闕下復掌群
牧司三班院親王諸宮事天禧二年為并代州鈐轄
兼管勾麟府路軍馬事三年卒年六十九孫全彬
全彬字長卿以知願奏補入內小黃門累遷西頭供
奉官仁宗使致香幣于南海密詔察所過州縣吏治
民俗還具以對帝以為忠謹陝右群盜殺鳳州巡檢
遺往擒滅之元昊叛全彬監鄜州兵救延州解圍去
經略使明鎬言其勇略善將得邊人情除并代州都

監加內侍押班進鉞轄徙鄜延還為押班儂智高寇廣南以為湖南江西路安撫副使出桂林請于宣撫使狄青願獨當一隊以自效於是使將左方兵力戰于邕州南方平領綿州防禦使張貴妃居寧華殿閣命全彬提舉妃薨治喪過制皆劉沆王洙與全彬共為之數月進宮苑使利州觀察使給兩使留後奉俄為入內副都知知制誥劉敞封還詞命居三月復授之轉領信武軍留後為永昭陵鉞轄時去永定復土四十二年有司多亡其籍全彬以心計辦治遷福延宮使提點奉先院熙寧中卒年七十六贈太尉定武

軍節度使謚曰恭僖

鄧守恩并州人十歲以黃門事太宗淳化中盜起成
都從王繼恩往討之至道初就護西蜀屯兵咸平初
為入內高班契丹入寇命石保吉為鎮定都部署以
守恩為都監踰年入掌驥驥院會龍騎叛卒剽劫環
慶遣守恩擒翦之景德初為澶濮都巡檢又使環慶
及戎瀘等州巡察邊事大中祥符初按獄于濮州雪
冤人十餘預監脩玉清昭應宮會靈觀七年又兼脩
真遊殿景靈宮累遷入內高品供奉官宮成遷內殿
承制八年預脩大內改西京作坊副使九年營造皆

畢授東染院使充會靈觀都監天禧二年掌軍頭引見司又脩祥源觀成遷崇儀使三年授入內押班河決滑州命為脩河鈴轄郊祀召為行宮使改如京使復還本任四年春河復故道遷文思院使歸朝加領昭州刺史是秋掌皇城國信二司整肅禁衛遷入內副都知會建天章閣命領其事又勾當資善堂兼太子左右春坊司守恩長七尺餘狀貌甚偉蒞事幹敏以彊果稱于時五年卒年四十八贈淄州防禦使錄其子官

列傳卷第二百二十五

列傳卷第二百二十六

宋史四百六十七

開寶同司上贊鑾國事前書有稱其國之領運事都總裁晚等奉

勅修

宦者二

楊守珍 韓守英 藍繼宗 張惟吉

甘昭吉 盧守慤 王守規 李憲

張茂則 宋用臣 王中正 李舜舉

石得一

梁從吉

劉惟簡

楊守珍字仲寶開封祥符人為入內黃門習書史學
兵家方略善射家僅過堂下一發貫鬚人服其精選

為環慶路走馬承受公事契丹謀入塞為鎮定高陽
關行營同押先鋒事會許民周繼宗為人誣告與外
夷交通干證者六十人辭服遣守珍覆問悉辦理出
之徙真定保趙等州駐泊都監邕桂等十州安撫都
監從曹克明降撫水州蠻築二柵以拒其要天禧初
擒盜於青灰山累遷西京作坊使帶御器械永興軍
兵馬鈐轄徙真定邠寧路為內侍省內侍押班提點
內弓箭軍器庫進內園使右班都知領端州刺史嘗
侍仁宗苑中命乘馬馳射賞其便習賜錦袍卮酒卒
贈原州防禦使

韓守英字德華開封祥符人初為入內高品從征河
東數奉詔至石嶺關督戰取隆州遷殿頭久之以西
頭供奉官擢入內內侍押班遷副都知隨王繼恩招
安西川為先鋒戰于劒門有功遷西京作坊使劒門
都監還勾當三班院進入內內侍都知歷定州鎮定
高陽關并代路兵馬鈐轄契丹圖奇嵐軍守英與鈐
轄張志言知府州折惟昌帥所部渡河抵朔州以牽
賊勢遂破狼水岩俘數百人獲馬牛羊鎧甲以數萬
計賊為解去賜錦袍金帶俄領會州刺史解都知再
遷昭宣使復領三班出為鄜延路都鈐轄徙并代路

建言本路宿兵多百姓困於飛輓今幸邊鄙無事請
留騎軍千餘人悉徙內地真宗曰邊臣能體朝廷恤民
之意宜詔諸路視此行之提舉在京諸司庫務勾當
皇城司為趙德明官告使歷宣政宣慶二使內侍左
班都知領獎州團練使雅州防禦使入內都知管勾
脩國史書成進景福殿使又為延福宮使入內都知
復提舉諸司庫務卒贈定國軍節度觀察留後
藍繼宗字承祖廣州南海人事劉鋗為宣者歸朝年
十二遷為中黃門從征太原傳詔營陳間多稱旨秦
州並邊有大小洛門砦自唐末陷西羌雍熙中溫仲

舒諭酋豪使獻其地徙衆渭北言者以為生事請罷
仲舒太宗遣繼宗往按視還奏二砦據要害產良木
不可棄帝悅復使繼宗勞賜仲舒累遷西京作坊副
使勾當內東門元德太后章穆皇后葬為按行園陵
使車駕北征勾當留司皇城司車駕謁諸陵近陵舊
乏水繼宗疏泉陵下百司從官皆取以濟擢入內副
都知為天書扶侍都監詔與李神祐第東封扈從內
臣之勞而入內供奉官范守遜等訴其不公罷都知
紀汾睢復為天書扶侍都監再遷東染院使明年領
會州刺史進崇儀使勾當皇城司脩玉清昭應宮與

劉承珪典工作官成遷洛苑使高州團練使充都監
坐章穆皇后陵隧墊貯如京使典脩景靈宮進南作
坊使復脩會靈祥源觀車駕幸亳州管勾留司大內
公事提舉在京諸司庫務勾當三班院脩國史院為
趙德明加恩使德明與繼宗射繼宗每發必中德明
遺以所乘名馬為內侍省右班都知遷入內都知仁
宗即位遷左騎驥使忠州防禦使永定陵脩奉鉉轄
歷昭宣宣慶使累上章求致仕特免入朝拜舞
及從行幸頃之復固請罷都知以景福殿使邕州觀
察使家居養疾卒贈安德軍節度使謚僖靖繼宗事

四朝謙謹自持每領職未久輒請罷家有園池退朝即亟歸同列或留之繼宗曰我欲歸種花卉弄游魚為樂爾景福殿置使自大中祥符間至繼宗授者纔三人養子元用元震元用終左藏庫使梓州觀察使元震以兄蔭補入內黃門轉高班給事明肅太后禁中夜火后擁仁宗登西華門左右未集元震獨傳呼宿衛以功遷高品為三陵都監條列防守法其後諸陵以為式歷群牧都監監三館祕閣積官皇城使累遷入內副都知忠州防禦使仙韶院火元震救護火以時息詔褒之賜襲衣金帶卒贈鎮海軍留後元震

養子五人不畜閨子

張惟吉字祐之開封人初補入內黃門遷殿頭高陽
關路走馬承受公事護塞滑州天臺埽役遷西頭供
奉官監在京榷貨務知嘉州張約以贓敗詔與御史
王軫往劾其獄還領內東門司為脩奉章獻章懿太
后二陵承受時議復用李誥榷茶筭繕法乃以惟吉
為內殿崇班復監榷貨務凡內侍領內東門次遷勾
當御藥院而惟吉縹進官衆以為薄惟吉欣然就職
再朞以羨餘遷承制為趙元昊官告使還言元昊驕
僭勢必叛請預飭邊備及元昊寇延州遣按視延鄜

環慶兩路器甲并訪攻守利害敵旣退夏竦韓琦謀
自鄜延深入乘虛擊之命惟吉募并汾驍勇副以土
兵輕齋赴河外惟吉以為我師當持重伺變不宜馳
赴不測以自困已而元昊果引去還奏稱旨領皇城
司遷內侍省押班群牧都監簡陝西冗兵領軍頭引
見司遷供備庫使盡汰軍頭司軍校之罷癃者同提
舉在京諸司庫務領恩州刺史為入內都知商湖決
為澧州脩河都鈐轄轉運使施昌言請亟塞崔嵬以
為歲災民困役宜緩命惟吉按視言河可塞而民誠
困財用不足宜少待之從其議遷如京使果州團練

使復領皇城司卒惟吉任事久頗見親信而言弗阿
徇張貴妃薨將治喪皇儀殿諸宦官皆以為可獨惟
吉曰此事干典禮須翌日問宰相旣而宰相不能執
議惟吉深以為非贈昭信軍節度觀察留後逾月又
贈保順軍節度使謚忠安養子若水字益之以惟吉
奏補小黃門給事童惠太后歿轉入內高品王師平
貝州征儂賊皆以幹敏選為走馬承受賊平以勞進
官三遷環慶路鉞轄討環州解七日族復有功歷帶
御器械內侍押班副都知熙寧初造神臂弓成神宗
御延和殿臨閣置鐵甲七十步俾衛士射未有中者

若水自請射連中徵札建慶壽寶慈兩宮典領工作
再遷嘉州防禦使以病斬解職領輝州觀察使提舉
四園苑諸司庫務卒贈天平軍留後

甘昭吉字祐之開封人初以內侍殿頭為英韶州巡
檢捕盜有功再遷內殿崇班京東路都巡檢齊州武
衛小校馮坦率營卒二百突入州廳事欲為變昭吉
單騎馳往戒所從將士操兵在外先獨見亂卒諭以
福禍令推首惡自贖衆疑沮不敢動已而操兵者皆
入即共執十餘人告曰此誘我者也昭吉立殺之縱
其餘去州以無事特遷供備庫副使帶御器械後內

侍省押班閼仁宗記前功特以授之遷入內副都知
英宗即位之夕昭吉直禁中翊衛有勞自文思副使
超遷供備庫使康州刺史昭吉奏曰臣本孤微無左
右之舉而先帝知臣朴直自小官拔用至此分當從
葬今願得洒掃陵寢足矣帝愛其忠特授永昭陵使
加如京使還朝表辭職以左龍武軍大將軍致仕卒
昭吉敦實慎密人士稱之

盧守勲字君錫開封祥符人自入內品累遷禮賓
使邠寧環慶路鉅轄還為入內內侍省押班領昌州
刺史明道中改葬章懿太后而舊藏有水以守勲嘗

典葬事罷為永興軍兵馬鈐轄徙鄜延路再遷六宅
使加貴州團練使進榮州防禦使兼邠寧環慶路安
撫都監元昊寇保安軍守勦率兵擊走之特遷左騎
驥使移陝西鈐轄初劉平石元孫被執守勦撫膺涕
泣不敢出又嘗易蕃官馬延州通判計用章勸范雍
棄城將保鄜州雍欲遣安撫都監李康伯往說賊不
肯行賊去而守勦用章更相論奏知制誥葉清臣以
守勦擁兵觀望請正其罪并按二人守勦奪防禦使
為湖北都監用章除籍配雷州本城康伯均州都監
父之復恩州防禦使遷利州觀察使歷真定府定州

北京路鈐轄以左衛大將軍致事卒贈保順軍節度使謚安恪養子昭序

王守規真定欒城人入內都都知守忠之弟守忠事真宗謹厚慎密眷遇最厚明道時守規為小黃門禁中夜半火守規先覺自寢殿至後苑皆擊去其鎖乃奉仁宗及皇太后至延福宮回視所經處已成焜燼翌日執政候起居帝曰非王守規導朕至此幾不與卿等相見以功遷入內殿頭選治京城水決汴河于公賈村決蔡河于四里橋水患以息加帶御器械積官至宣慶使康州防禦使內侍右班副都知卒年六

十七贈昭武 ■ 軍留後

李憲字子範開封祥符人皇祐中補入內黃門稍遷供奉官神宗即位歷永興太原府路走馬承受數論邊事合旨幹當後苑王韶上書請復河湟命憲往視師與韶進收河州加東染院使幹當御藥院復戰牛精谷拔珂諾城為熙河經略安撫司幹當公事按視鄜延軍制行至蒲中會木征合董彊鬼章之兵攻破踏白城殺景思立圍河州詔趣赴之憲馳至軍先是朝廷出黃旗書敕諭將士如用命破賊者倍賞於是憲晨起帳中張以示衆曰此旗天子所賜也視此以

戰帝寶臨之士爭呼用命以進督諸將傍山焚族帳
即日通路至河州賊餘衆保踏白官軍出與戰大破
之進至餘川又破賊堡十餘木征率酋長八十餘人
詣軍門降捷聞以功加昭宣使嘉州防禦使還為入
內內侍省押班幹當皇城司安南叛副趙高招討未
行高建言朝廷置招討副使軍事須共議至節制號
令即宜歸一憲銜之由是屢紛辨遂罷憲而令乘驛
計議秦鳳熙河邊事諸將皆聽節度於是御史中丞
鄧潤甫御史周尹蔡承禧彭汝礪極論其不可又言
鬼章之患小用憲之患大憲功不成其禍小有成功

其禍大章再上弗聽冷雞朴誘山後生羌擾邊木征請
自効衆以為不可憲曰何傷乎羌人天性畏服貴種
聽之往木征盛裝以出衆聳視皆無鬪志師乘之殺
獲萬計斬冷雞朴董氈懼即遣使奉贊効順加宣州
觀察使宣政使入內副都知又遷宣慶使時用兵連
年歲支調度不繼詔憲兼經制財用裁冗費什六歲
運西山巨木給京師營繕賜瑞應坊園宅一區元豐
中五路出師討夏國憲領熙秦軍至西市新城復蘭
州城之請建為帥府帝又詔憲領兵直趣興靈董氈
亦稱欲往宜乘機協力入掃巢穴若興靈道阻即過

河取涼州乃總兵東上平夏人于高川石峽進至屈
吳山營打囉城趨天都燒南牟府庫次葫蘆河而還
憲既不能至靈州董氈亦失期師無功憲欲以開蘭
會邀功弭責同知樞密院孫固曰兵法期而後至者
斬况諸路皆至而憲獨不行不可赦帝以憲猶有功
但令詰擅還之由憲以餽飼不接為辭釋弗誅復上
再舉之策兼陳進築五利且從之會李順舉入奏具
陳師老民困狀乃罷兵趣憲赴闕道賜銀帛四千為
涇原經略安撫制置使給衛三百進景福殿使武信
軍留後使復還熙河仍兼秦鳳軍馬夏人入蘭州破

西關降宣慶使憲以蘭州乃西人必爭地衆數至河外而相羊不進意必大舉乃增城守塹壁樓櫓具備明年冬夏入果大入圍蘭州步騎號八十萬衆十日不克糧盡引去又詔憲遣間諭阿里骨結等且選騎度河與賊遇破之坐妄奏功狀罷內省職事哲宗立改永興軍路副都總管提舉崇福宮御史中丞劉摯論憲貪功生事一出欺罔避興靈會師之期頓兵以城蘭州遺患至今永樂之圍逗留不急赴援降宣州觀察使又貶右千牛衛將軍分司南京居陳州卒年五十一紹聖元年贈武泰軍節度使初謚敏恪改忠敏

憲以中人為將雖能拓地降敵而罔上害民終貽患
中國云

張茂則字平甫開封人初補小黃門五遷至西頭供
奉官幹當內東門禁庭夜有盜茂則首登屋以入旣
獲賊遷領御藥院仁宗不豫中夜促召茂則趨入扶
衛左右或欲掩宮門茂則曰事無可慮何至使中外
生疑耶帝疾間欲處以押班懇求補外轉宮苑使果
州團練使為永興路兵馬鈐轄入為內侍押班再遷
副都知樞寧初同司馬光相視恩冀深瀛四州生隄
及六塔二股河利害進入內都知上元夜宮中火督

衆即撲滅詔曰宮禁不驚帑藏如故惟忠與力予固嘉之賜以窄衣金帶累乞退休言受國厚恩廩食過量積而未請者七年乞入三司毀券詔褒之仍進其官哲宗即位遷寧國軍留後加兩省都都知卒年七十九茂則性儉素食不重味衣裘累十數年不易紹聖論元祐人以茂則嘗預任使追貶左監門衛將軍崇寧中入黨籍

宋用臣字正卿開封人為人有精思彊力以父蔭隸職內省神宗建東西府築京城建尚書省起太學立原廟導洛通汴凡大工役悉董其事性敏給善傳詔

令故多訪以外事同列悉藉以進朝士之乏廉節者
往往詣附之權勢震赫一時積勞至登州防禦使加
宣政使元祐初言者論其罪降為皇城使謫監滁州
太平州酒稅四年主管靈僊觀紹聖初召為內侍押
班進瀛州刺史徽宗即位遷蔡州觀察使入副都
知為永泰陵脩奉鉉轄卒陵下贈安化軍節度使謚
僖敏謚議謂用臣為廣平宋公有天子念公之勞久
徙于外之語豐稷論奏以為凡稱公者皆須著宿大
臣與鄉黨有德之士其曰念公之勞久徙于外斯乃
古周公之事於用臣非所宜言也止令賜謚論者是

之

王中正字希烈開封人因父任補入內黃門遷赴延
福宮學詩書曆筭仁宗嘉其才命置左右慶曆衛士
之變中正援弓矢即殿西督捕射賊悉就擒時年甫
十八人頗壯之遷東頭供奉官歷幹當御藥院鄜延
環慶路公事分治河東邊事破西人有功帶御器械
神宗將復熙河命之規度還言熙河譬乳虎抱玉乘
爪牙未備可取也遂從王韶入熙河治城壁守具以
功遷作坊使嘉州團練使擢內侍押班吐蕃圍茂州
詔率陝西兵援之圍解自石泉至茂州謂之隴東路

土田肥羨西羌據有之中正不能討乃因吐蕃入寇
言其路經靜州等族擣僻不通邇年商旅稍往來故
外蕃因以乘間縣至綿與茂道里均而龍安有都巡
檢緩急可倚仗請割石泉隸綿而窒其故道從之隴
東遂不可得還使熙河經畫鬼章進昭宣使入內副
都知元豐初提舉教畿縣保甲將兵捕賊盜巡檢獻
民兵伍保法請於村疃及縣以時閱習悉行其言復
徃鄜延環慶經制邊事詔凡所須用度令兩路取給
無限多寡既行又稱面受詔所過募禁兵願從者將
之主者不敢違問罪西夏以中正簽書涇原路經略

司事詔五路之師皆會靈州中正失期糧道不繼士卒多死命權分屯鄜延麟城砦以俟後舉自請罷省職遷金州觀察使提舉西太一宮坐前敗貶秩元祐初言者再論其將王師二十萬公違詔書之罪劉摯比中正與李憲宋用臣石得一為四凶又貶秩兩等父之提舉崇福宮紹聖初復嘉州團練使卒年七十

一
李舜舉字公輔開封人世為內侍曾祖神福事太宗以信謹終始舜舉少補黃門仁宗使督工冶金為器既成有羨數并上之帝嘉其不欺出為秦鳳路走馬

承受英宗立奏事京師會帝不豫內謁者止之宮門
舜舉曰天子新即位使者從旛來不得一見而去何
以慰遠人謁者以聞亟召對帝意良悅因言承受公
事以察守將不法為職而終更論最乃使帥臣保任
乞免之遂刪舊制熙寧中歷幹當內東門御藥院講
筵閣實錄院郭逵討交州以為廣西幹當公事軍中
之政得與講畫或疾置入朝稟受成筭會逵既亦降
左藏庫副使以文思院使領文州刺史帶御器械進
內侍押班制置涇原軍馬五路師出無功議再舉李
憲督饋糧言受密詔自都轉運使以下乏軍興者皆

聽斬民懲前日之役多死於凍餒皆憚行出錢百緡
不能雇一夫相聚立柵山澤不受調吏往逼呼輒殿
擊解州至城縣令以督之不能集舜舉入奏其事乃
罷兵退詣中書王珪迎勞之曰朝廷以邊事屬押班及
李留後無西顧之憂矣舜舉曰四郊多壘此卿大夫
之辱相公當國而以邊事屬二內臣可乎內臣正宜供
禁庭洒掃之職豈可當將帥之任聞者代珪慚焉轉
嘉州團練使沈括城永樂遣舜舉計議被圍急斷衣
襟作奏曰臣死無所恨願朝廷勿輕此賊尋以死聞
贈昭信軍節度使謚曰忠敏舜舉資性安重與人言

未嘗及官省事頗覽書傳能文辭筆札在御藥院十四年神宗嘗書李舜舉公忠奉上恭勤檢身始終惟一以安以榮十九字賜之

石得一開封人為內侍黃門累官內殿承制神宗時帶御器械管幹龍圖天章寶文閣皇城司四遷入內副都知元祐初領成州團練使罷內省職御史劉摯言得一頃筦皇城恣其殘刻縱遣還者所在綦布張寃設網以無為有以虛為實朝廷大吏及富家小人飛語朝上暮入狴犴上下惴恐不能自保至相顧以目者殆十年坐降左藏庫使卒紹聖中贈隨州觀察

使

梁從吉字君祐開封人補入內高班王則反奉命宣慰還言小寇無多慮諸將之兵足以翦除若得重臣統其事不崇朝可平矣於是仁宗以文彥博為安撫招討使賊平又奏請分河北為路每路以一帥府統之遂建魏鎮定瀛四帥熙寧初為邠寧環慶路駐泊兵馬鈐轄夏人寇大順城圍慶州七砦從吉率兵八百餘人與戰獲其首領又討平寧州叛卒以功升都銓轄累官皇城使從高遵裕至寧武督士卒攻城身被創甚進入內押班遷永州團練使為副都知元祐

中卒贈成德軍節度使謚曰敏恪

劉惟簡開封人由入內黃門積官至昭宣使康州刺史高陽關路兵馬都監為入內押班英宗初立惟簡自河北來朝請對寢門內謁者難之獨引見皇太后惟簡立福寧殿下雨沾衣不退帝起坐幃中望見呼問曰諸路如汝者幾人何以獨來對曰陛下新即位臣來自邊塞未瞻天表不敢輒還不知其他帝歎曰小臣知所守如此識其姓名屏間他日神宗覽所題屏擢幹當延福宮自是蒙親信交人叛詔馳驛至桂州審視事勢還言帥臣劉彝貞功生事罪當誅乾德

狂童頸不足繫帝信之郭逵趙高南征以為行營承
受逵高被謫惟簡亦奪一官陝西五路師還受命撫
犒士卒以疾先還者不賜惟簡心知其不便至慶州
疏言士卒不幸以將臣上違聖略糧食不繼逃生以
歸其情可貸今同立庭中而不預賜恐患生倉卒帝
用其言均予之又使案閱河北保甲振濟京西水灾
參定諸陵薦獻旣而為言者所劾擯不用哲宗在藩
時惟簡奔奏服勤及親政召至左右以內侍押班卒
贈昭化軍留後

列傳卷二百二十六